

Inunnut innarluutilinnut ulloq unnuarlu najugaqarfissatut neqeroorutini kinguaassiuutinut tunngasutigut pissutsit, aamma kinguaassiuutitigut innarliisarnerit

Kamilla Nørtoft
Bonnie Jensen
Sonja Sørensen
Else Jensen
Ivalu Olsen
Steven Arnfjord
Sofie Emma Rubin



INNUNNUT INNARLUUTILINNUT ULLOQ UNNUARLU NAJUGAQARFISSATUT NEQEROORUTINI
KINGUAASSIUUTINUT TUNNGASUTIGUT PISSUTSIT, AAMMA KINGUAASSIUUTITIGUT
INNARLIISARNERIT

**Inunnut innarluutilinnut ulloq unnuarlu najugaqarfissatut neqeroorutini kinguaassiuutinut
tunngasutigut pissutsit, aamma kinguaassiuutitigut innarliisarnerit**

Kamilla Nørtoft, Bonnie Jensen, Sonja Sørensen, Else Jensen,
Ivalu Olsen, Steven Arnfjord, Sofie Emma Rubin

Kalaallisuunngortitsisoq: Else Jensen

Suliamik nalilersuisoq: Sigurd Lauridsen

Copyright © 2023

Statens Institut for Folkesundhed, SDU

Issuaaneq, tassunga ilanngullugit takussutissianik aamma tabelinik, pisinnaavoq issuaaffigineqartup
erseqqissumik nalunaarneratigut.

Elektroniskimik saqqummersitaq: ISBN 978-87-7899-629-9

Statens Institut for Folkesundhed

Studivestrad 6

1455 København K

www.sdu.dk/sif

Nalunaarusiaq uani aaneqarsinnaavoq www.sdu/sif

Siulequt

Inuit annertuumik innarluutilit ukiut qulikkuutaat arlaqanngitsut matuma siorna Kalaallit Nunaanniit Danmarkiliartinneqartarput, tassani innarluutilinnut angerlarsimaffinni najugaqassallutik. Taamaalilluni inunnut innarluutilinnut ulloq unnuarlu najugaqarfissatut neqeroorutit Kalaallit Nunaanni nutaajukannerput.

Meeqqanut, Inuusuttunut Ilaqutariinnullu Naalakkersuisoqarfiup suliakkiineratigut 2022-p naajartornerani suliassaqarfiup iluani suliamut attuumassuteqanngitsunit misissuinerit aallartinneqarput, ulloq unnuarlu najugaqarfissatut neqeroorutini atugassarititaasut nalinginnaasut, kinguaassiuutinut tunngasut aamma kinguaassiuutitigut innarliinissamik aamma kannguttaatsuliorfiginninnissamik pitsaaliuineq, aamma ulloq unnuarlu najugaqarfissatut neqeroorutini najugaqartut isiginninnerat sammivigalugit.

Nalunaarusiaq una ineqartut kinguaassiuutinut tunngasutigut ilitsersorneqarnissaminnut periarfissaannut, aamma kinguaassiuutinut tunngasutigut pisariaqartitaminnik naammassinninnissaannut, kiisalu ulloq unnuarlu najugaqarfissatut neqeroorutini kinguaassiuutitigut kannguttaatsuliorarnernut, innarliisarnernut aamma taakkuninnga pitsaaluinermut tunngavoq. Misissuinerup takutippaa, sulisut pineqartoq pillugu ilisimasaat aamma kinguaassiuutitigut pissusilersuutit pillugit najugaqartunik oqaloqateqarlutillu ilitsersuinissaminnut piginnaasaqassusiat assigiinngitsorujussuusut. Pineqartoq pillugu sulisut qanoq isummersortarnerannut assigiinngissutit annertuut taakku kinguaassiuutitigut kannguttaatsuliorfiginninnissat aamma innarliinissat pitsaaliornissaannut periarfissanut sunniuteqarput.

”Inunnut innarluutilinnut ulloq unnuarlu najugaqarfissatut neqeroorutini kinguaassiuutinut tunngasutigut pissutsit, aamma kinguaassiuutitigut innarliisarnerit” Innuttaasut Peqqissusiannik Ilisimatusarfimmit aamma Ilisimatusarfimmi Issittumi Atugarissaarneq pillugu Ilisimatusarfimmit saqqummiussinnaagatsigu tulluusimaarutigivarput. Nalunaarusiaq inassuteqaatinik arlalinnik, suliassaqarfiit suut suliagarfigeqqinneqarsinnaanerannik, aamma qanoq iliorluni sularineqarsinnaanerannik saqqummiussiffiuvoq, taamaalillutik najugaqartut ulloq unnuarlu najugaqarfissatut neqeroorutini qanorluunniit ittuni najugaqaralarunik maannakkornit annertunerusumik toqqissisimanartumik tunngavissaqarlutik kinguaassiuutinut tunngasutigut pisariaqartitaminnik piviusunngortitsisinnaaniassammata. Aamma neriuutigivarput, inassuteqaatit sularineqarnerat siunissaq ungasinnerusooq eqqarsaatigalugu pitsaaliuinermik suliagarnermut tapertaasinnaassasoq.

Misissuinerimut tapertaasunut tamanut qujanaq.

Atuarluarina,

Christina Viskum Larsen
Ilisimatusarnermut aqutsisoq,
Innuttaasut Peqqissusiannik Ilisimatusarfik

Steven Arnfjord
Centerimi aqutsisoq,
Ilisimatusarfimmi Issittumi Atugarissaarneq pillugu Ilisimatusarfik

Imarisai

Eqikkaaneq	4
1 Aallaqqaasiut	6
Tunuliaqutaq aamma siunertaq	6
Inuup kinguaassiuutinut tunngasutigut ineriartortarnera.....	6
Periuseq	8
2 Ineqartut kinguaassiuutinut tunngasutigut pisariaqartitaat aamma pissusilersuutaat	10
Kinguaassiuutinut tunngasunik oqaluuserinnineq	10
Ineqartut kinguaassiuutinut tunngasutigut inuuneqarnerat aamma atortorissaarutit.....	12
Ilisimasaqassuseq aamma ilinniartitaaneq.....	14
3 Kinguaassiuutitigut kannguttaatsuliorfiginninnissamik pitsaaliuineq	16
Ammasumik pissuseqarneq ammasumik periuseqalersitsisarpoq	16
Suliassaqarfimmik suliaqarsinnaanerup qaffasissup pitsaaliunissaq periarfissaqarnerulersissavaa.....	16
Sulinermi najoqqutassat nutaat	17
Ineqartut kinguaassiuutinut tunngasutigut ujartuillutillu malugititsiniaraangata	18
4 Malittarisassat aamma najoqqutassat	21
Kannguttaatsuliorfiginninnermik imaluunniit innarliinermik pasitsaassinermi iliuusissatut pilersaarutit.....	22
5 Kinguaassiuutitigut kannguttaatsuliorfiginninnerit aamma innarliinerit	26
Inassuteqaatit	29
Najoqqutat	31

Eqikkaaneq

Siunertaq aamma periuseq

Nalunaarusiami matumani siunertarineqartooq tassaavoq, inunnut innarluutilinnut ulloq unnuarlu najugaqarfissatut neqeroorutini¹ kinguaassiuutinut tunngasutigit inuuneqarneq, kinguaassiuutinut tunngasutigit pisinnaatitaaffiit, kinguaassiuutitigit kannguttaatsuliorfiginninnermut aamma innarliinernut tunngasunik, kiisalu malittarisassanik aamma najoqqutassanik ilisimasaqarneq pillugit pissutsinik ilisimasaqalersitsinissaq. Nalunaarusiami matumani paasissutissat misissuinnermit pisuupput, inunnut innarluutilinnut ulloq unnuarlu najugaqarfissatut neqeroorutini tamani aqutsisut aamma sulisut toqqakkat apersorneqarnissaminnik periarfissaqarsimallutik. Paasissutissat apersuinnermit pisut ulloq unnuarlu najugaqarfissatut neqeroorutini arfineq-marlunni pulaarluni malinnaaffiginninnermit paasissutissanik ilaneqarput.

Ineqartut kinguaassiuutitigit pisariaqartitaat aamma pissusilersuutaat

Kinguaassiuutinut tunngasutigit inuuneqarneq, kinguaassiuutinut tunngasutigit ilitsersuineq, kinguaassiuutinut tunngasutigit pisariaqartitsineq aamma ineqartut akornanni kinguaassiuutinut tunngasutigit pissusilersuutit pillugit ulloq unnuarlu najugaqarfissatut neqeroorutini aqutsisut aamma sulisut qanoq periuseqarfiginninnerat allanngorartorujussuuvoq. Allanngorarneq ilaatigut sammisaq pillugu qanoq aamma qanoq annertutigisumik oqaluuserineqartarnersoq, aamma perorsaanikkut sulinerup iluani kinguaassiuutinut tunngasutigit qanoq suleriaaseqarnermi takuneqarsinnaapput. Perorsaanikkut sulinermi kinguaassiuutinut tunngasutigit inuuneqarneq aamma kinguaassiuutinut tunngasutigit pissusilersuutit qanoq periuseqarfiginissai pillugit ilisimasaqarnerulernissaq aamma ilinniartitaanissaq sulisut apersorneqartut amerlasuut ujartorpaat. Ineqartut kinguaassiuutinut tunngasutigit inuuneqarnerat ulloq unnuarlu najugaqarfissatut neqeroorutit ilaanni ilaanni ammasumik oqaluuserineqartarput. Ulloq unnuarlu najugaqarfissatut neqeroorutit ilaanni sulisut ilisimangilaat ineqartut akunnerminni imaluunniit allanik atoqateqartarnersut, aamma ulloq unnuarlu najugaqarfissatut neqeroorummi ataatsimi isumaqartoqarpoq ineqartut kinguaassiuutinut tunngasutigit atuineq ajortut, aamma taamaattumik sulisut imaluunniit aqutsisutut tamatumunnga periuseqarfiginninnissaq pisariaqanngitsoq. Ineqartut kinguaassiuutinut tunngasutigit pisariaqartitaminnik matussusiinissaannut periaatsit aamma ulloq unnuarlu najugaqarfissatut neqeroorummiit ulloq unnuarlu najugaqarfissatut neqeroorummut allamut assigiinngillat. Kinguaassiuutinut tunngasutigit iliuutsit ineqartut inaanni pisassasut sumiiffinni arlariinni pingaartinneqarpoq. Ulloq unnuarlu najugaqarfissatut neqeroorummi ataatsimi najugaqartut timimik titartagaq qalipaartilersorlugu immersuisimapput, najugaqartut timimik suatungaartigut attorneqarusunnginnermut, aamma pisut ilaanni timimik suatungaartigut attorneqarnissartik ajorinnginneraat tassuunakkut paasinarsisinneqarluni. Ulloq unnuarlu najugaqarfissatut neqeroorutit ilaanni kinguaassiuutinut tunngasunik aamma pisariaqartitsinermik oqaluuserinninnerit ingerlanneqarnerusarput. Taamaattorli tamatuma oqaluuserinissaa sulisut ataasiakkaat akornanni qanoq ajornakusoortinneqartiginersoq imaluunniit qanoq ajornanngitsiginersoq assigiinngitsorujussuuvoq. Ulloq unnuarlu najugaqarfissatut neqeroorutini

¹Nalunaarusiami taaguutit "ulloq unnuarlu najugaqarfissatut neqeroorut/døgnstilbud", "najugaqarfissatut neqeroorut/botilbud", "najugaqarfik/bosted" aamma "paaqqutarinniffik/institution" taarseraallugit atorpavut, oqaatsit allanngorartillugit atorumallugit. Taaguutit atukkavut uagut tungitsinninngaanniit assigiinngitsunut immikkoortiteriniarnermik tunngaveqanngillat.

INUNNUT INNARLUUTILINNUT ULLOQ UNNUARLU NAJUGAQARFISSATUT NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA KINGUAASSIUUTITIGUT INNARLIISARNERIT

arlalinni najugaqartut kinguaassiuutinut tunngasutigit atortorissaarutinik pigisaqarput, soorlu "usuusaq" (dildo), inuusaq atoqatigiinnermut tunngasoq (sexdukke) imaluunniit silikonimik "utsuusaliaq" (silikonevagina). Ulloq unnuarlu najugaqarfissatut neqeroorutit ilaanni ineqartut arlallit akunnerminni atoqatigiittarlutilluunniit paaqqutarinniffiup avataaneersunik atoqateqartarput. Ulloq unnuarlu najugaqarfissatut neqeroorutit ilaanni amerlanngitsuni najugaqartut kinguaassiuutitigit atoqatigisartakkaminnit avataaneersunit pulaartoqarsinnaapput.

Kinguaassiuutitigit kannguttaatsuliorfiginninnissamik pitsaaliuineq

Ulloq unnuarlu najugaqarfissatut neqeroorutini kinguaassiuutitigit kannguttaatsuliorfiginninnissat assigiinngitsunik iliuseqarnikkut pitsaaliorneqartarput. Ulloq unnuarlu najugaqarfissatut neqeroorutini Namminersorlutik Oqartussanit pigineqartuni pitsaaliuinermit suliniutitut nutaajunerusut ilaattut eqqunneqartoq tassaavoq, unnuami ikinnerpaamik marlunnik pigartoqartassasoq, aamma uffartoqarnerani, aamma assersuutigalugu nangermik taarsiisoqarnerani sulisut marluk najuuttassasut. Tamannali sulisunik ammigaateqarneq pissutigalugu sumiiffinni arlalinni eqqortissallugu unammillernartoqarsinnaavoq, taamaattumillu aaqqiissutinik allanik atuisoqartariaqarluni. Ulloq unnuarlu najugaqarfissatut neqeroorutini, ineqartut kinguaassiuutitigit inuuneqarnerat pillugu oqaluuserinnillaqqissunik sulisoqartuni, aamma ineqartut namminneq pisariaqartititik eqqarsaatitillu pillugit ammaffiusuni sulisut susoqarneranik malinnaasinnaanertik ajornannginnerutippaat. Tamanna ineqartut killissaminnik qaangiiffigineqarnissaminnik aarlerinartorsionersut, aamma pisussaannngitsunik pisoqarnerasoq pillugu nalileruminarnerulersitsivoq.

Malittarisassat aamma najoqqutassat

Ulloq unnuarlu najugaqarfissatut neqeroorutini assigiinngitsuni malittarisassat aamma najoqqutassat pillugit, aamma ineqartut kinguaassiuutinut tunngatillugu pisinnaatitaaffii aamma innarlerneqarnissamut aamma kinguaassiuutitigit atonerlunneqarnissamut illersugaanermut tunngasutigit sumiiffimmi najoqqutassanik suliaqartoqarsimanersaq pillugu ilisimasaqarneq assigiinngitsorujussuvoq. Sumiiffinni tamani sulisut apersorneqartut tamarmik ikinnerpaamik marlunnik unnuarsiortoqartarnissaanik, aamma uffartoqarnerani aamma nangermik taarsiisoqarnerani sulisut marluusarnissaanik najoqqutassat nutaat eqqumaffigivaat. Najugaqartut kinguaassiuutinut tunngasutigit inuuneqarnerat, aamma kinguaassiuutinut tunngasutigit pisinnaatitaaffii pillugit allassimasunik malittarisassaqarnerasoq assigiinngilaq. Paaqqutarinniffiit ilaanni sulisut ataatsimiinnerini oqaluuserineqartarput, aamma najugaqatigiiffiit ilaanni kinguaassiuutinut tunngasutigit aalajangersimasumik politikkeqartoqarluni. Tamatumunnga tunngasunik ilisimasaqarnerulernissaq kissaatigalugu sumiiffimmi ataatsimi oqaatigineqarpoq.

Kinguaassiuutitigit kannguttaatsuliorfiginninnerit aamma innarliinerit

Ineqartunut kinguaassiuutitigit kannguttaatsuliornerup, imaluunniit innaarliinerup pisimaneranik pasitsaassisimaneq, imaluunniit pisimaneq pillugu ulloq unnuarlu najugaqarfissatut neqeroorutini tamani aqutsisut aamma/imaluunniit sulisut ilaat ilisimasaqarput. Pisut ilaat qangali pisimasuusimapput, aamma allat ukiut kingullit ingerlanerini pisimasuusimallutik. Pisut ilaanni sulisut akuusimapput, aamma pisut ilaanni inuit illoqarfimmeersut akuusimallutik. Kinguaassiuutitigit kannguttaatsuliorneq aamma innarliineq pillugit pasitsaassinermi aamma ilisimasaqarnermi qanoq periuseqarnissaq ilisimasaqarfialugu apersorneqartut amerlanerpaat isumaqarput.

1 Aallaqqaasiut

Tunuliaqutaq aamma siunertaq

Arnaq, 23-nik ukiulik, annertuumik innarluutilik, ulloq unnuarlu najugaqarfissatut neqeroorummi lvaqqami Kujataaniittumi najugalik, angummit 62-inik ukiulimmit pinngitsaalineqarsimanermi kingunerisaanik meerartaarsimasoq Kalaallit Nunaanni tusagassiorfitsigut 2022-mi septembarimi saqqummiunneqarpoq (Rytoft, 2022). Tamatuma kingunerisaanik suliassa qarfiup iluani sakkortusisamik iliuuseqarnerit arlallit eqqunneqarput – nangilersuinermi, isumassuinermi aamma eqqiluisaarnikkut pisuni sulisut tamatigut marluk najuuttassasut, aamma unnuarsiortut tamatigut marluusassasut (Kristensen, 2022). Suliniutissat allat assigiinngitsut sulisunit, aqutsisoqatigiinnit aamma angajoqqaanit eqqartorneqarsimapput, soorlu ineqartut inaasa matuini igalaalersuinissaq, kiisalu filmiliuutininik nakkutilliinermut atortunik ikkussuinissaq, kisianni taakku arlaannaalluunniit atuutilersinneqanngillat (Rytoft, 2023).

Innarliineq tamanna suliassa qarfiup iluani Naalakkersuisup nuna tamakkerlugu misissuisoqarnissaanik kissaateqarneranik, nalunaarusiami matumani nalunaarusiarineqartumik, kinguneqarpoq. Kinguaassiuutinut tunngasutigut innarliinissap pitsaaliornissaanut tunngatillugu sulisut ilisimaqassusiisa misissorneqarnissaat pingaaruteqartoq, nuna tamakkerlugu najugaqarfissatut neqeroorutini najugallit namminneq kinguaassiuutitigut pisariaqartitsillutillu pisinnaatitaaffeqarlutik inuusut akuersaassallugu aamma pingaaruteqarpoq. Taamaattumik misissuinermi matumani innarliinissap aamma kannguttaatsuliorfiginninnissap pitsaaliorneqarnissaat, kiisalu najugaqartut kinguaassiuutinut tunngasutigut inuuneqarnerminnik ingerlatsisinnaanerannut periarfissaat sammineqarput. Misissuineq misissuinermut annertunerusumut, aamma ulloq unnuarlu najugaqarfissatut neqeroorutini pissutsinut nalinginnaasunut tunngasunik sammisaqarfiusumut (Rubin et al. 2023) aamma ulloq unnuarlu najugaqarfissatut neqeroorutit pillugit ineqartut isiginninnerannut (Nørtoft et al. 2023) ilaavoq.

Inunnut innarluutilinnut ulloq unnuarlu paaqutarinniffiit nuna tamakkerlugu arfineq-marluupput, aamma avataani immikkoortortat pingasuullutik. Inatsisit tunngavigineqartut tassaapput Inuit innarluutillit tapersorsorneqarnissaannut Inatsisartut inatsisaat nr. 13. 12. juni 2019-imeersoq, kiisalu Inunnut innarluutilinnut najugaqarfissatut neqeroorutit pillugit Namminersorlutik Oqartussat nalunaarutaat nr. 19, 4. november 2019-imeersoq.

Inuup kinguaassiuutinut tunngasutigut ineriartortarnera

Inuup kinguaassiuutinut tunngasutigut ineriartortarnera meeraanermi aallartittarpoq, aamma meeqqat inunngornerminni kinguaassiuutinut tunngasutigut qisuariaateqalereersarput – allaat tamanna sioqqullugu. Tissassarneq aamma kinguaassiuutinut tunngasutigut pinnguarneq meeqqanut peqqinnartuullutillu nalinginnaasuupput. Meeqqat aamma inersimasut innarluutillit kinguaassiuutinut tunngasutigut pinnguarnermik aamma attuuanninnermik, ilaalu ilanngullugit misilittagaqalernissaminnut allatulli assinganik periarfissaqartuaanneq ajorput (Buttenschøn, 2001). Taamaattumik angajoqqaat aamma ulluunerani paaqqinnittarfinni- aamma najugaqarfissatut neqeroorutini sulisut tamatumingna immikkut eqqumaffiginnittariaqarput (www.retsinformation.dk, 2001). Taamatut timimik suliaqarnermi, inunnut innarluutilinnut najugaqarfissatut neqeroorutini assigiinngitsuni ulluinnarni sulinermit ilaasumi, suliassa qarfimmi suliamik ilisimasaqassutsimik, piffissamut tunngasumik aamma misigissutsitigut nukissanik ilaqartarpoq, aamma pisut taamaattut eqqortianermik, aarlerinermik aamma killissat tungaatigut ajornartorsiutinik ilaqartarlutik. Sulisunit

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

qanissutsimik aamma ungasissutsimik oqimaaqatigiissitsinissap eqqortup eqqornissaa pineqarpoq, najugaqartup aamma sulisup akornanni timikkut attaveqarneq kissalaamik, iluarinninnermik aamma atassuteqaqatigiinnerup pitsaanerulersinnissaanik takutitsinnermut tunngassuteqarmat (Engen, 2016). Ilutigitillugu sulisut aamma najugaqartut akornanni kinguaassiuutinut tunngasutigit atassuteqaqatigiittoqaqqusaanngilaq, taamaalilluni aamma najugaqartut aamma sulisut akornanni timikkut ajunngitsumik aamma ilorrisimaarnartumik attaveqaqatigiinneq kinguaassiuutinut tunngasumut saatinneqannginnissaa anguniarlugu oqimaaqatigiissinneqassalluni.

Buttenschøn (2001) nassuiarpai, pisariaqartitsinnermut- aamma ineriartornermut killiffiit assigiinngitsut, ineriartornermikkut innarluutillit kinguaassiuutinut tunngasutigit inuuneqarnermut atatillugu pigisinnaasaanut tunngasut. Taassuma taakku assigiinngitsunut sisamanut agguataarpai:

- a. Kinguaassiuutinut tunngasunik pisariaqartitsinnermikkut/soqutiginninnermikkut takutitsinngitsut
- b. Kinguaassiuutinut tunngasutigit ineriartornermikkut namminneq isumaginnittut
- c. Kinguaassiuutinut tunngasutigit inuuneqarnermikkut namminneq tigusinissamikkut ilinniarsinnaasut
- d. Kinguaassiuutinut tunngasutigit pisariaqartitamikkut matussusiinissaminnut ikiorneqartariaqartut.

Barstad (2006) nassuiarpai, inuit innarluutillit ilaat kinguaassiuutinut tunngasutigit qanoq sakkortutigisumik piumassuseqarlutillu kajumissuseqartartut, aamma allat sakkukitsumik imaluunniit piumassuseqanngivillutilluunniit kajumissuseqarneq ajortut. Pisariaqartitsinnerit assigiinngitsut taakku inunnut ataasiakkaanut tunngasuupput, aamma imaanngilaq tamarmik pinngitsoornatik kinguaassiuutinut tunngasutigit inuuneqartariaqartut, kisianni kinguaassiuutinut tunngasutigit atuinissamikkut imaluunniit atuinnginnissamikkut toqqaanissaminnut tamarmik periarfissaqassapput. Innarluutillit kinguaassiuutinut tunngasutigit atuinissamikkut piviusunngortitsinissaminnut periarfissaannik, imaluunniit paasissutissinneqarnermik tunngavilimmik atuinnginnissamikkut periarfissaqarnissaat isumassuinermik suliallit akisussaaffigivaat (Barstad, 2006). Shah (2017) nassuiarpaa, inuit innarluutillit kinguaassiuutinut tunngatillugu inuuneqarnissaannik inuit amerlanerit naqisimanninnerat inuusuttut innarluutillit, inuusuttunut innarluuteqanngitsunut ukioqatigisaminnut sanilliullutik, kinguaassiuutinut tunngasutigit tunngaviusumik ilisimasaqarnissamik aamma ilinniartinneqarnissamik amigaateqarnerannut tapertaasut. Tamatuma kingunerisaanik kinguaassiuutinut tunngasutigit pitsaanngitsunik misigisaqarnissaminnut qaninnerupput, tamannalu akilersilluni atorittarnermik, pornografimik, kinguaassiuutinut tunngasutigit nakuusernermik, pilersaarutaanngitsumik naartulernermik kiisalu kinguaassiuutitigit tunillaassuuttumik nappaateqalernermik kinguneqarsinnaavoq. Misigisartakkat atassuteqarfigisat atornerluinerattut aamma nikanarsaanerattut amerlasuutigit pisartutut isigineqarput (Shah, 2017; United Nations, 2012).

Malittarisassami FN'imeersumi '*Standard Rules on the Equalization of Opportunities for Persons with Disabilities*'-imi, 1993-imi naqissuserneqartumi, ilaatigit erseqqissarneqarpoq innarluutillit namminneq kinguaassiuutitigit inuuneqarnermikkut misigisaqarnissaannik, kinguaassiuutitigit atoqateqartarnissaannik, aamma namminneq ilaqutariinngornissamik periarfissaannik itigartinneqassanngitsut. Tamatuma saniatigit erseqqissarneqarpoq, inuit innarluutillit ilaqtaminnit, inuiaqatigiinnit aamma paaqqutarinniffinni kinguaassiuutimikkut atornerlunneqarnissaminnut immikkut aarlerinaateqarnerusut, aamma atornerluinerit pisarnerat qanoq pinngitsoortinneqarsinnaanersoq, qaqugukkat atornerluineq pisimanersoq aamma atornerluineq qanoq nalunaarutigineqarsinnaanersoq pillugit ilinniartinneqarnissamikkut

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

pisariaqartitsisut (United Nations, 1993). Inuit innarluutillit inunnut innarluuteqanngitsunut sanilliullutik kinguaassiuutimikkut innarlerneqarnissaat aarlerinaateqarnerusoq, aamma angutinut aamma nukappiaqqanut sanilliullugu arnanut aamma niviarsiaqqanut aarlerinaateqarnerusoq uppersaatissaqarluarpoq (Cunningham & Sena, 2013; Engen & Ibsen, 2022; United Nations, 2012). Niviarsiaqqat aamma arnat, ataatsimik imaluunniit arlalinnik innarluutillit, ilutigitillugu nunat inoqqaavinit kingoqqisut nakuuserfigineqarnissaminnut, tassunga ilanngullugu kinguaassiuutitigut innarlerneqarnissaminnut suli aarlerinaateqarnerupput (United Nations, 2012). Aammattaaq inuit najugaqarfissatut neqeroorutini assigiinngitsuni najugallit innarlerneqartarnerat annertuneruvoq (United Nations, 2012). Innarliinerit nalinginnaasumik ilaqutariit angerlarsimaffiini, imaluunniit najugaqarfissatut neqeroorutini pissaaneqarnikkut assigiinngitsunik inissisimaffeqarfiusuni pikkajuttarput (Engen & Ibsen, 2022).

Periuseq

Nalunaarusiaq una inuit innarluutillit Kalaallit Nunaat tamakkerlugu ulloq unnuarlu najugarfissatut neqeroorutini suliaqarnermi paasissutissanit pissarsiarineqartunit tunngaveqarpoq. Paasissutissat Ilulissani, Sisimiuni, Maniitsumi, Nuummi, Paamiuni aamma Tasiilami ulloq unnuarlu najugaqarfissatut neqeroorutini, Namminersorlutik Oqartussanit pigineqartuni, aqutsisunik qulingiluanik aamma sulisunik 15-inik najoqquataqarluni apersuinermit, kiisalu ulloq unnuarlu najugaqarfissatut neqeroorutini arfineq-marlunni malinnaaffiginninnernit² tunngaveqarput. Tamatuma saniatigut kommunimi sulisut tallimat – kommuninit tamanit ataaseq – oqarasuaatikkut/onlinekkut apersuinermit peqataapput, kommunip najugaqarfissatut neqeroorutaani pissutsit oqaluttuarineqarlutik.

Apersorneqartup nammineq toqqaanera malillugu apersuinerit danskisut imaluunniit kalaallisut ingerlanneqarput. Apersuinerit ataasiakkaat danskisut ingerlanneqarput, apersuinerup nalaani kalaallisuunngortillugit nutserneqarlutik.

Najugaqarfinni assigiinngitsuni aqutsisut sulisunik apersorneqartussanik peqataasussarsiornermut peqataapput. Apersuinermit peqataaneq kajumissutsimik tunngaveqarpoq, aamma aqutsisut sulisullu apersorneqartut tamarmik apeqqutit qanoq ittut apeqqutigineqassanersut, aamma akissutit qanoq atorneqassanersut pillugit nassuiaanneqarlutik. Peqataasut tamarmik peqataanisaminnut akuersinermut atsiortut Apersorneqartut eqqarsaatigalugit issuaanerit nalunaarusiami atorneqartut atermik, normulersuinermit imaluunniit allatut aqqissuussamik nalunaarsorneqanngillat. Oqaaseqartut aqutsisuunersut imaluunniit sulisuunersut taamaallaat immikkoortinneqarlutik.

	Naapillugit	Oqarasuaat/video	Katillugit
Najugarfinni aqutsisut	8	1	9
Najugarfinni sulisut	14	1	15
Kommunimi sulisut		5	5
Katillugit	22	5	29

² Ilisimatusartut marloriarlutik, marsimi aamma maajimi, Qaqortuliariarluarput, kisianni tamanna silamik pissuteqartumik pisinnaajunnaarsinneqarpoq, taamaallilluni angalanerit unitsinneqartariaqarsimallutik. Juunimi pisinnaanersoq misissorneqarpoq, kisianni piffissami tassani angallannikkut periarfissaqarsimanngilaq. Piffissap misissuiffiusussap iluani Uummannaliarnissaq pisinnaasimanngilaq. Ulloq unnuarlu najugaqarfissatut neqeroorutit pineqartut marluk taakku apersuinermit najoqqutamik nassinneqarput, aamma apeqqutit allakkatigut akissuteqarfiginissaannut peqatiserineqarlutik. Taakku taamaaliorsimanngillat.

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

Apersorneqartunut, immikkoortunut assigiinngitsunut pingasunut taakkununnga, apersuinermit najoqqutat allanngortillugit atorneqarput. Apeqqutit pingaarnertut sammineqartunut makkununnga tunngassuteqarput:

- Ineqartut kinguaassiuutinut tunngasutigit pisariaqartitaat pillugit najoqqutassanik ilisimasaqarneq aamma suleriaaseqarneq
- Kinguaassiuutitigit kannguttaatsuliornissap pitsaaliorneqarnissanut tunngatillugu najoqqutassanik ilisimasaqarneq aamma suleriaaseqarneq
- Ineqartut akornanni kinguaassiuutitigit iliuuseqaqatigiittarneq pillugu ilisimasaqarneq aamma suleriaaseqarneq
- Ineqartut aamma allat, tassunga ilanngullugit sulisut akornanni kinguaassiuutitigit iliuuseqaqatigiittarneq pillugu ilisimasaqarneq aamma suleriaaseqarneq

Apersuinerit tamarmik allaganngortinneqarput, aamma kalaallisut apersuinerit danskisuumut nutserneqarlutik. Apersuinerit tamarmik tamatuma kingorna sammisakkaarlugit koderneqarput.

Issuaanerit nalunaarusiami atorneqartut sapinngisamik atuaruminarsarlugit aaqqissuunneqarput, ilutigitillugulu apersorneqartup aalajangersimasup apersuinerup nalaani qanoq oqaatiginneriaaseqarneranik ersersitsilluni.

Nalunaarusiami apersuinermit paasissutissat ulloq unnuarlu najugaqarfissatut neqeroorutinit pulaakkatsinnit arfineq-marlunnit malinnaaffiginninnermit paasissutissanik ilaneqarput. Malinnaaffiginninnerit ilisimatusartunit, ulloq unnuarlu najugaqarfissatut neqeroorutini ulluni arlalinni, ullup ingerlanerani piffissani assigiinngitsuni, najuuttunit ingerlanneqarput. Malinnaaffiginninnerit katillugit nalunaaquttap akunnerini 48-ni ingerlanneqarput. Ineqartut aamma sulisut akunnerminni iliuuseqaqatigiinnerat, aamma atortut aamma atortorissaarutit tigussaasut assigiinngitsut ineqartut kinguaassiuutinut tunngasutigit periarfissaannut tunngassutillit, imaluunniit inuttut killissamik qaangiiffiigitinnissamut aamma innarlerneqarnissamut pitsaaliuinnermut tunngassutillit ilisimatusartunit malinnaaffigineqarput.

2 Ineqartut kinguaassiuutinut tunngasutigut pisariaqartitaat aamma pissusilersuutaat

Inunnut innarluutilinnut ulloq unnuarlu najugaqarfissatut neqeroorutini kinguaassiuutinut tunngasutigut pissutsit ineqartut sumut illersorneqarnissaannut taamaallaat tunngassuteqanngillat. Ulloq unnuarlu najugaqarfissatut neqeroorutini ineqartut kinguaassiuutinut tunngasutigut pisariaqartitaqarput, aamma aqutsisut sulisullu aperivagut, ineqartut kinguaassiuutinut tunngasutigut pisariaqartitaat aamma pissusilersuutaat akunnerminni qanoq oqaloqatigiissutigisarneraat, ineqartut kinguaassiuutinut tunngasunik, pisariaqartitanik aamma killissanik qanoq oqaloqatigisarneraat, aamma ineqartut kinguaassiuutinut tunngasutigut pisariaqartitaminnik naammassinnissaannut qanoq ilitersorlugillu tapersersortarneraat.

Kinguaassiuutinut tunngasunik oqaluuserinninneq

Sammissap oqaluuserinera aamma suliarineqartarnera eqqarsaatigalugu aqutsisunit aamma sulisunit qanoq isummerfigineqarnera allanngorartorujussuuvoq. Sulisut ataasiakkaat oqaatigivaat, ineqartut akunnerminni, imaluunniit allanik kinguaassiuutitigut atoqateqartarnersut ilisimanagu. Ulloq unnuarlu najugaqarfissatut neqeroorummi ataatsimi sulisoq apersorneqartoq isumaqarpoq, tamanna isummerfigissallugu pisariaqanngitsoq, sulisoq taanna naapertorlugu ineqartut kinguaassiuutinut tunngasutigut pisariaqartitsinngimmata. Taassuma nassuiaatigivaa, ineqartut tamarmik ilaqutariittut inissisimasut, taamaattumillu kinguaassiuutinut tunngasunik imminnut eqqarsaateqarfigineq ajortut, aamma taamaattumik allanik kinguaassiuutitigut atoqateqarneq ajortut:

Apersuisoq: Sulisut soorlu kinguaassiuutinut tunngatillugu pisariaqartitsineq pillugu ineqartunik oqaloqateqartarpat?

Sulisuq: Taamaaliorneq ajorput. Tamanna pillugu oqaloqatigineqarneq ajorput.

Apersuisoq: Ineqartut kinguaassiuutitigut pisariaqartitaannut aamma pissusilersuutaannut tunngatillugu najoqqutassaqaarpisi?

Sulisuq: Tamatumunnga tunngatillugu najoqqutassaqaanngilaq, kisianni taamaaliorneq ajorput. Nuannisaqatigiinnartarput.

Apersuisoq: Tassa ineqartut akornanni arlaannaalluunniit imminnut sammineq ajorput?

Sulisuq: Aap, ilaqutariittut uanga isigivakka. Taamatut imminnut isigipput.

Aqutsisoq ataaseq nassuiaavoq, kinguaassiuutit pillugit aamma kinguaassiuutinut tunngasutigut pisariaqartitsineq pillugu ineqartut aqutsisoqatigiinnit aamma sulisunit oqaloqatigineqartartut. Sumiiffimmi tassani sulisut oqaluttuarput, kinguaassiuutinut tunngasut pillugit ineqartut oqaloqatigineq ajoritsik.

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

Ulloq unnuarlu najugaqarfissatut neqeroorummi inuusuttunit (20-t inorlugit ukiulinnit) najugaqarfiusumi aamma ineqartut taakku kinguaassiuutinut tunngasutigut inuuneqarnerannut tunngatillugu isummersorneq allanngorarpoq. Sumiiffiit ilaanni ataatsimi sulisoq isumaqarpoq, najugaqartut kinguaassiuutinut tunngasutigut pisariaqartitaqanngitsut. Ulloq unnuarlu najugaqarfissatut neqeroorummi allami sulisoq ataaseq oqaluttuarluni, kinguaassiuutinut tunngasutigut pissusilersuutit tamarmik ineqartup inaani pisassasut sulissutigineqartoq, aamma atuagaaraq, ineqartumit inuup allap sukcut attoqqusaannginneranut tunngasoq, ullut tamaasa atuarneqartartoq. Ulloq unnuarlu najugaqarfissatut neqeroorutit pingajuanni ineqartut tamarmik inuup timaanik titartagaq qalipaatilorsorlugu immersorsimavaat, ineqartoq pineqartoq sukcut attorneqarusunnginneranik, aamma pisut ilaanni aamma tamatigit sukcut attorneqarsinnaaneranik takutitsisoq. Titartakkat taakku atilersorlugit tamanit takuneqarsinnaasumi nivingapput, taamaalilluni sulisut aamma najugaqartut najugaqartut ataasiakkaat attuaneqarnissaminut killiliussaannut qanoq pissuseqarnissartik ilisimajuaannassammasuk. Ilutigitillugu ineqartut kinguaassiuutinut tunngasutigut pissusilersorlutillu namminneq, aamma allat timaannik soqutiginnittut sulisunit oqaloqatigineqartarput.

Ulloq unnuarlu najugaqarfissatut neqeroorutit sinnerini kinguaassiuutinut tunngasutigut, aamma kinguaassiuutinut tunngasutigut pisariaqartitsineq pillugit oqaluuserinninneq aamma ilitsersuineq sammineqarnerusarpoq, taamaakkaluartoq sammisap tamatuma qanoq annertutigisumik, aamma qanoq oqitsigisumik imaluunniit oqimaatsigisumik oqaluuserineqartarnera sulisunut aamma aqutsisunut allanngorarluni – namminneq akunnerminni, aamma ineqartut peqatigalugit. Sulisoq ataaseq oqaluttuarpoq:

Ineqartut siullermeerutaasumik atoqateqarusukkaangata qanoq issinnaaneranik, aamma qanoq misigineqarsinnaaneranik oqaluttuuttarpavut. Kisianni iluarusullutik nuannisarlutillu oqartuaannarput. Nuanniilliorsimasumik suli naammaattuugaqanngilanga.

Sulisoq alla oqaluttuarpoq, ineqartut kinguaassiuutinut tunngasunik aamma killissanik oqaluuserisaqarusuttartut:

Maaniinnera tamakkerlugu ineqartut peqatigalugit oqaloqatigiissutigisarpavut. Kinguaassiuutinut tunngasutigut pissusilersorneq peqqinnanngitsaq aamma peqqinnartoq. Tamatuma ingerlaavartumik oqaluuserinissaa ineqartut pikkoriffigivaat. Ammapput.

Sulisoq ataaseq nassuiaavoq, kinguaassiuutinut tunngasutigut oqaloqatigiinneq iliuusissanik ilitsersuineramik aamma killiliinissamut qanoq tunngassuteqalersarnersoq.

Maani aallartikkama tamanna sammineq ajorparput, kisianni ineqartut soorlu kinguaassiuutinut tunngasunik oqaluuserinnileraangata taava nassuiaattarpavut taassuma pisariaqartippagu maani atortuuteqartugut, kisianni ineqartut kimilluunniit attorneqartussaannngitsut, ineqartuugaluarpat, sulisuugaluarpat avataaneersuugaluarpalluunniit.

Sulisut sisamaat oqaluttuarpoq, pingaarnertut najugaqartut kinguaassiuutinut tunngasutigut oqaloqatiginninnissamik pisariaqartitsinerat qaqugukkut tamatuma pisarneranut aqutsisooqataasoq:

Kinguaassiuutinut tunngasunik najugaqartunik oqaloqateqartarnera taakku uannut aggerlutik tamanna pillugu oqaloqateqarusukkaangata pinerusarpoq.

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

Misissuinerup taamaalilluni takutippaa, kinguaassiuutinut tunngasut pillugit sulisut amerlasuut ineqartunik oqaloqateqartartut, kisianni oqaluuserineqartuni sammisaq pingaarneq allangorartuusarluni. Ilutigitillugu saqqummerpoq, ulloq unnuarlu najugaqarfissatut neqeroorutit ilaanni ineqartut kinguaassiuutinut tunngasut pillugit oqaloqatigineqarneq ajortut.

Ineqartut kinguaassiuutinut tunngasutigit inuuneqarnerat aamma atortorissaarutit

Aqutsisoq ataaseq oqaluttuarpoq, kinguaassiuutinut tunngasut aamma eqqiluisaarnissamut atortut, soorlu usuup puui, aamma atoqatigeereermermi iluarsaassisarnissaq pillugit ineqartunik qanoq oqaloqateqartarnerlutik. Ilutigitilluguli ineqartut nammineq inuuneqarnerisa ataqqineqarnissaat sammineqartorujussuvoq:

Ineqartut ilaat peerariipput, aamma ilaat imminnut pulaartarput, naak peerariinngikkaluarlutik. Taamaattumik iniminni sulerisarnersut naluarput, kisianni sulisut ingerlaavartumik neqeroorfigisartussaavaat: "Ininni naammattunik usuup puujuteqarpit? Atoqateqaraangavit atortussatit pigivigit?" Taava aamma eqqiaaneq pillugu oqaloqatigisarpavut: atorsimasatik sumut igissaneraat. Kisianni taannarpiaq pinnagu (atoqatigiinneq, aaqq.).

Sulisog ataaseq oqaluttuarpoq, ineqartut atoqatigiinniarlutik imminnut pulaaraangamik namminneq oqaatigisaraat. Ineqartut ammasuunerisa kajumissutsimik pineranik aamma ineqartunut akuusunut nuannersuuneranik sulisut eqqumaffiginninnissaannut iluaqutaavoq:

Ineqartut immikkoortortaqarfiit akornanni imminnut pulaartarnerat sapaatit akunnerisa naanerini pikkajuttartuuvoq. Atoqatigiikkusukkaangamik oqartarput iniminnut matu matuniarlugu, nuannisaalaarlutillu ilorrisimaalaarniassagamik. Ajornartorsiuteqarfiginngilavut, (ineqartut namminneq killissaminnik imminnut qaangiiffigisarnerat, aaqq.), pissutigalugu oqaluttuariinnavittaramikkit. Sulerisimanerlutik ammasorujussuarmik oqaluttuarisarpaat.

Sulisog ataaseq oqaluttuarpoq, ineqartoq ataaseq peerartaarusullunilu meerartaarusukkaluartoq, kisianni taassuma qanoq iliussanerluni nalugaa. Taava sulisut tamanna pillugu ineqartoq oqaloqatigivaat:

Naamik, kinguaassiuutinut tunngasut pillugit ineqartut oqaloqatigerpiarneq ajorpavut. Uanga tamanna misigivallaarnikuunngilara. Kisianni ineqartup tamanna oqaluuserippagu tusarnaarsinnavagut. Uanga misiginikuunngilara. Ineqartoq ataaseq peerartaarnissamik kissaateqarpoq, aamma meerartaarusulluni. Taanna qanoq iliussanerluni aperisarpog. Sapinngisara tamaat akiniarsarisarpara. Ineqartut akunnerminni atoqatigiittarnerat misiginikuunngilara. Ineqartoq siusinnerusukkut taaneqartoq allamut pulaartarnikuuvoq, kisianni suneq ajorput (kinguaassiuutinut tunngasutigit, aaqq.).

Aqutsisoq ataaseq oqaluttuarpoq, ineqartup aalajangersimasup kinguaassiuutinut tunngasutigit pissusilersuutaasa ineqartut kinguaassiuutinut tunngasutigit inuuneqarnerat pillugu sulisut eqqumaffiginninnissaannik aamma iliussissaannik qanoq eqiaallatsitsimanersoq:

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

*Pineqartoq ullaakkut iteraangami tissaqqasarpoq. Taava oqarfigisarpaput:
"Piareeruit oqarumaarputit", atisalersornerani kisimiitilaarlugu. Ineqartup taassuma
kinguaassiuutinut tunngasutigit eqqumanerulersippaatigit. Iliuusissatut
pilersaarutininik sulisut, sulisut ataatsimiinnerini, oqaluuserinnittarput. Assersuutigalugu
init tarrarsuutilersornikuuagut, ineqartut taamaalillutik timitik
misissorsinnaaniassammattigit. Taava uffaraangata minutsinik tallimanik, imaluunniit
minutsinik qulinik piffissaleqqittarpavut, kisimiinnissartik pisariaqartikkaangassuk.
Taava timertik maluginiarsinnaavaat.*

Aqutsisoq alla oqaluttuarpoq, najugarfimmi pineqartumi ineqartut kinguaassiuutinut tunngasutigit iliuuseqartarunnaareernikuusut. Apersuinerulli ingerlanerani saqqummerpoq, ineqartut arlallit kinguaassiuutinut tunngasutigit pissusilersuuteqartartut, kisianni taassuma oqarneratut "namminneq tamanna isumagisarlugu". Ulloq unnuarlu najugaqarfissatut neqeroorummi tassani najugaqartoq aalajangersimasooq usuup puuinik tunineqartarpoq, ineqartoq alla inuusamik atoqatigiinnermut tunngasumik (sexdukkemik) peqarluni. Ineqartut akornanni aappareeqarpoq imminnut atoqatigiittartunik, kisianni ineqartut sinnerisa kinguaassiuutinut tunngasutigit iliuuseqarnissartik periarfissaqarfigalugulu kajumissuseqarfigineraat sulisut apersorneqartut ilisimangilaat. Ineqartoq ataaseq oqaluttuarineqarpoq, kinguaassiuutinut tunngasutigit ima annertutigisumik iliuuseqartartoq taassuma noqartarneranut sunniuteqarsinnaalluni, aamma noqarnermik kinguneqarsinnaalluni. Tamanna pissutigalugu taassuma kinguaassiuutinut tunngasutigit iliuuseqartarnera sulisunit killersimaarniarneqarpoq, kisianni ineqartoq ullup unnuallu ingerlanerani nalunaaquttap akunnerpassuini kinguaassiuutinut tunngasutigit pissusilersuuteqaraangat tamanna ajornakusoortarpoq.

Ulloq unnuarlu najugaqarfissatut neqeroorutini arlalinni ineqartut ilaat kinguaassiuutinut tunngasutigit pinnguaatinik (sexlegetøjnik), ilaannikkooriarlutik atortakkaminnik, pigisaqarput. Aqutsisut arlallit aamma sulisut taamaalillutik oqaluttuarput, ineqartut kinguaassiuutinut tunngasutigit pinnguaatinik (sexlegetøjnik), imaluunniit atortorissaarutininik qaqugukkut atuerusukkaangamik namminneq qanoq oqaatiginnissinnaanersut. Taaneqakajuttut tassaapput "usuusat" (dildot), inuusaq atoqatigiinnermut tunngasoq (sexdukke), imaluunniit silikonimik "utsuusaliaq" (silikonevagina). Ineqartut taakkuninnga qanoq atuissanersut, aamma atoreerunikkit qanoq salissaneraat sulisunit oqaluttuunneqartarput. Ulloq unnuarlu najugaqarfissatut neqeroorutit ilaanni ineqartut namminneq kinguaassiuutinut tunngasutigit atortorissaarutininik/pinnguaatinik (sexlegtøjnik) iniminni pigisaqarput, aamma atoruserunikkitt namminneq saqqummersinnaasaminnik. Ulloq unnuarlu najugaqarfissatut neqeroorutini allani atoruserunikkitt tunniutequllugit qinnuiginnittarput. Sulisup ataatsip ineqartoq ataaseq oqaatsinik atuisinnaangitsoq oqaluttuarivaa. Ineqartoq inuusaminik atoqatigiinnermut tunngasumik (sexdukkemik) atuerusuttoq sulisut malugisinnaagaangamikku innarfissap nalaani inuusaq atoqatigiinnermut tunngasoq (sexdukke) najugaqartumut saqqummertarpaat. Sulisut ilaasa oqaatigivaat, ulloq unnuarlu najugaqarfissatut neqeroorummi kinguaassiuutinut tunngasutigit atortorissaarutit assigiinngitsut taakku qanoq pissarsiarineqarsimanersut ilisimangikkitsik. Allat oqaluttuarput, atortorissaarutit kissaatigineqartut pisiarinissaannut ineqartunut ikiuussinnaallutik, kisianni ineqartut namminneq akilissagaat. Sulisoq ataaseq oqaluttuarpoq, ineqartoq kinguaassiuutinut tunngasutigit atortorissaarummik kissaateqaraluarluni nammineq akilersinnaangikkuniuk qanoq iliuuseqartoqarsinnaangitsoq. Ataasiakkaat oqaatigivaat, ineqartut ilaat pornonik, aamma kinguaassiuutinut tunngasunik allanik namminneq oqarasuaatiminnit imaluunniit tablettiminnit isiginnaagaqartartut.

Aqutsisoq ataaseq oqaluttuarpoq, ulloq unnuarlu najugaqarfissatut neqeroorummi aalajangersimasumi tassani arnat ineqartut marluk ilaannikkooriarlutik angutininik ineqartunik,

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

taakkunannga akilerneqarlutik, atoqateqartartut. Aqutsisoq oqaluttuarpoq, ineqartut arlallit peerartaarusullutik takorluugaqartut, kisianni tamanna taakkununnga ajornakusoortuusoq. Ineqartut ilaat akunnerminni kinguaassiuutinut tunngasutigut pisariaqartitaminnik matussuseeqatigiitarpur, naak peerariinngikkaluarlutik.

Najugaqarfii ilaanni najugaqartoqarpoq illoqarfimmi najugalinnik kinguaassiuutitigut atoqateqartartunik. Najugaqartut arnat kisimik taama iliortartut apersuinernit paasissutissani taaneqarput. Ilaat aalajangersimasumik kinguaassiuutitigut atoqateqartartuupput, allat assigiinngitsunik kinguaassiuutitigut atoqateqartarlutik. Ulloq unnuarlu najugaqarfissatut neqeroorutini ataasiakkaani sulisut oqaluttuarput, najugallit kinguaassiuutitigut atoqatigisartakkaminnit avataaneersunit ulloq unnuarlu najugaqarfissatut neqeroorummi iniminni pulaartoqarsinnaasut. Sulisoq ataaseq oqaluttuarpoq, piffissap ilaani inuup ataatsip pulaarnissaa inerteqqutigisariaqarsimagitsik, taassuma ineqartut arlallit kinguaassiuutitigut nappaammik tunillassimammagit.

Misissuinerup takutippaa, ineqartut kinguaassiuutinut tunngatillugu pisariaqartitaminnik matussusiinnaanerat allanngorartorujussuusoq, aamma kisimiillutik atortorissaarutininik atortoqarlutik, imaluunniit allamik atoqateqarlutik taamaaliortarnersut. Ulloq unnuarlu najugaqarfissatut neqeroorutini amerlanerni najugaqartoqarpoq kinguaassiuutinut tunngasutigut pinnguaatinik pigisaqartunik, aamma pissarsiarinissaannut imaluunniit atornissaannut sulisunit ilitsersuunneqarlutik ikiorneqartartunik.

Ilisimasaqassuseq aamma ilinniartitaaneq

Aqutsisut aamma sulisut arlallit oqaatigivaat, kinguaassiuutit pillugit sulisunik aamma ineqartunik oqaloqateqarnissaq namminerminnut ajornakusoorsinnaasooq. Kinguaassiuutinut tunngasut oqaluuserineq ajorlugit sulisut ilaasa toqqaannartumik oqaatigivaat. Aqutsisut arlallit oqaluttuarput, misiliisarlutik, kisianni kinguaassiuutinut tunngasunik qanoq oqaluuserinnittarneq, aamma ineqartut kinguaassiuutinut tunngatillugu pisariaqartitaminnik matussusiinnaaneranun tunngatillugu ilitsersuinissamut namminneq aamma sulisut ilinniartitaanikkut amigaateqarlutik. Sulisoq ataaseq ima oqarpoq:

Sulisut, assersuutigalugu uanga, ilinniartitsinissamik, imaluunniit qanoq iliortoqarsinnaanera pillugu periarfissanik misissuinissannut ajornakusoortitsivunga. Uannut ajornakusoorpoq.

Aqutsisoq ataaseq oqaluttuarpoq, kinguaassiuutinut tunngasut, aamma ineqartut kinguaassiuutinut tunngasutigut pisariaqartitaat sulisut ataatsimiikkaangata oqaloqatigiissutigisaritsik, kisianni aqutsisoq aamma sulisoq sammisap qanoq periuseqarfiginissaannut tunngatillugu ilisimasassanik aamma atortussanik amigaateqarput:

Siornatigut oqaluuserinaveersaagaasorujussuunikuuvoq. Kisianni massakkut ammanerulaalernikuuvoq. Ineqartut namminneq iniminnukassapput, aamma inuttut namminneq inuunertik taqqamani atussavaat. Kisianni suliassaqarfitta iluani kinguaassiuutinut tunngasutigut ilinniartinneqarnerusariaqarpugut, uanga taama isumaqarpunga. Tamanna oqaluuserisartorujussuullugulu aallupparput. Sammisat ilaat sulisunut sakkortuallaalaartarpur. Tamanna aamma oqaluuserisartorujussuuarput. Timip ilaatigut sukkuut attuisinnaanersut ineqartut

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

*ilinniartittarpavut. Kisianni tamatumunnga tunngasutigut
ilinniartinneqarnerusariaqaraluarput. Ineqartut ilaannikkooriartutik
qimmassarneqarnissamik pisariaqartitsisarput. Oqaatigisinnaanaguluunniit
kalerrisaarutigivallaarsinnaanngilaat, kisianni qisuaariaatit allarpassuillu
pissusissamisoortumik takkuttarput.*

Aqutsisup allap oqaatigivaa, aqutsisut aamma sulisut kinguaassiuutinut tunngasutigut aamma
killiliinissamut tunngasutigut ilisimasassanik aamma ilinniartinneqarnissamik amigaateqartut:

*Sapaatip akunnerata ataatsip missaa qaangiuttoq ataatsimiikkatta tusaasinnaavara
sulisut ilisimasassanik amigaateqartut. Aammami kinguaassiuutinut tunngasunik
pikkorissartinneqaratta sivitsorpoq. Tamanna ullut arlariit qaangiupput
eqqaaqqammerakku, tassa amigaatigigipput, killissanut tunngasut
assigiinngitsorpassuillu, tamakku ilisimasaqarfigivallaanngilagut.*

Aqutsisut pingajuat, qulaani taaneqartunut marlunnut akerliusumik, isumaqarpoq ulloq unnuarlu
najugaqarfissatut neqeroorummi tassani aqutsisuuffigisamini ilisimasassanik amigaateqarnatik.
Taanna oqaluttuarpoq, sulisut ajornartorsiutitaqanngitsumik kinguaassiuutinut tunngasunik aamma
kinguaassiuutinut tunngasutigut pisariaqartitsinerit pillugit oqaluuserinnittartut. Taanna ima
nassuiaavoq:

*Ullaakkut ataatsimiikkaangatta ineqartut ataasiakkaat pillugit assistentit aamma
immikkoortortani aqutsisut oqaloqatigisarpavut – aamma kinguaassiuutinut tunngasut
pillugit. Assersuutigalugu ineqartut ilaat peqatissaminik, imaluunniit kinguaassiuutinut
tunngasutigut pinnguaatinik arlaannilluunniit pisariaqartitserpasikkaangat periarfissat
oqaluuserisarpavut. Ineqartummi akunnerminni atoqatigiissinnaatitaapput. Tamanna
nalunngilaat, aamma killissat pillugit ilisimasaqarput. Aappaa naaggaarpat, taava
susoqarsinnaanngilaq.*

Misissuinerup takutippaa, kinguaassiuutinut tunngasunik aamma kinguaassiuutinut tunngasutigut
pisinnaatitaaffiit pillugit ineqartunut qanoq ilitsersuillunilu oqaloqatiginninnissamik
ilisimasaqarnissamik amigaateqarneq siammasissumik ajornartorsiutaasoq, aamma aqutsit
sulisullu amerlasuut suliassaqarfiup taassuma iluani ilinniartinneqarnissaminnik ujartuisut.

3 Kinguaassiuutitigut kannnguttaatsuliorfiginninnissa mik pitsaaliuineq

Ammasumik pissuseqarneq ammasumik periuseqalersitsisarpoq

Ulloq unnuarlu najugaqarfissatut neqeroorutini kinguaassiuutitigut

kannnguttaatsuliorfiginninnissamik pitsaaliuineq assigiinngitsunik suliniuteqarnikkut pisarpoq.

Qulaani taaneqartut sumiiffiit ilaanni kinguaassiuutitigut tunngasutigut sulisunik

oqaloqateqarnissaq najugaqartunit ammaffigineqartorujussuuvoq. Tamanna ineqartut ataasiakkaat

pisariaqartitaasa suunerannik, aammali ineqartut ataasiakkaat allanut killiliinissaminnut

ikiortariaqarnersut, imaluunniit allat killiliinerannik maluginnillutillu ataqqinnissaannik sulisut

pasitsaassinissaannut pitsaasumik periarfissaqalersitsisarpoq.

Sulisut aamma aqutsisut arlalliit oqaluttuarput, tamakku pillugit ineqartut qanoq

oqaloqatigisarnerlugit:

Najugaqartoqarnikuuvoq arnanik tamanik attuuannittartumik. Taanna oqaloqatigivarput, aamma taamaalioqqusaannginnerup paasinissaanut ikiorlugu. Aamma ineqartut arnat ilaqarsinnaasarput sulisunik angutinik inequginnittunik. Ineqartut taakku killissat pillugit, aamma qanoq ilioqqusaannginneri pillugit oqaloqatigisarpavut. Aamma sulisut taamaalioqqusaannginnerat pillugu ineqartut ilisimatittarpavut.

Ineqartut tamanna pillugu oqaloqatigisalerpavut. Iserfigeriarlugit atoqatigineqartassanngillat. Naaggaarnissaminnut pisinnaatitaaffeqarput. Ima oqartalernikuupput: "Taamaalioqqusaanngilanga." Taamaaliortoqarsimappat ineqartut sulisunut oqassapput: "Una uanga perusunngisannik ima imalu iliorpoq." Taava tassa taanna killigalugu sulisunik tamatuminna oqaloqateqartalerput.

Suliassaqarfimmik suliaqarsinnaanerup qaffasissup pitsaaliunissaq

periarfissaqarnerulersissavaa

Najugaqartut kinguaassiuutitigut tunngasunik, killissanik aamma pisinnaatitaaffinnik

oqaloqatigisarnerat ammasumik pissuseqalersitsillunilu najugaqartut sunik misigisaqartarlutillu

eqqarsaateqartarnerisa malinnaaffiginissaannut periarfissamik annertunerulersitsinera assigalugu

perorsaanikkut suliassaqarfimmik suliaqarsinnaaneq kannnguttaatsuliorfiginninnissat

pitsaaliornissaannut pingaaruteqarpoq. Aqutsisup ataatsip perorsaanikkut isumalluutit

tamatumunngarpiq pingaaruteqassusiat nassuiarppa:

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

Isumalluutit aamma suliaasaqarfiup iluani suliaqarsinnaaneq amigaatigineqarpata kannguttaatsuliorfiginninnissap peratarsinnaanera annertunerulissaaq. Pitsaaliuinermik suliaqarneq pingaaruteqartorujussuuvoq, aamma isumalluutit amigaatigineqarpata peratarsinnaanera (kinguaassiuutitigut innarliineq aamma kannguttaatsuliorfiginninneq, aaqq.) tamatuma annertunerulersissinnaavaa.

Sulinermi najoqqutassat nutaat

Suliniutit nutaanerit ilaat, akuersissutigineqarlunilu atuutilersinneqartoq, ataaseq Namminersorlutik Oqartussat ulloq unnuarlu najugaqarfissatut neqeroorutaani tamani pitsaaliuinerut aaqqiissutigineqartoq tassaavoq, unnuarsiortut ikinnerpaamik marluusassasut, aamma uffartoqarnerani, aamma assersuutigalugu nangermik taarsiinermi sulisut marluk najuuttassasut. Pisuni amerlasuuni ineqartumut tamanna sakkortullunilu iluaaginarsinnaavoq, sulisup ataatsip kisimi najugaqartup uffarnerani ikiuunnissaa pisariaqartinneqarsimatillugu. Perorsaaneq aamma ileqqorissaarneq eqqarsaatigalugit ulloq unnuarlu najugaqarfissatut neqeroorutini arlalinni toqqaannanginnerusumik periuseqarluni suliniummik aaqqiinissaaq toqqaarneqarsimavoq. Sulisoq ataaseq ima oqaluttuarpoq:

Ataaseq najuutissaaq ikiuullunilu, sulisup aappaata taamaallaat susoqarnerisooq takusinnaallugulu tusaasinnaassallugu. Ineqartummi aamma ataqqisussaavagut. Pineqartoq saassunneqartutut, taamatulluunniit misigimassanngilaq. Sulisut aamma ilikkarnikuuaat, uffartoqarnerani ineqartoq toqqaannartumik attussannginnamikku, kisianni ineqartup assaa alliussasooq (ineqartup nalikkaamigut asattornerani qanoq ikiortarneritsik assani atorlugit takutippaa, aaqq.). Tamakku.

Ulloq unnuarlu najugaqarfissatut neqeroorummi, amerlasuut sulisunit taarserneqartartumik nangermik atuillutik ineqarfigisaanni, aqutsisoq ataaseq nassuiaavoq, sulisut ineqartup nangianik taarsiileraangamik tamanna pillugu imminnut ilisimatitseqatigiittassasut:

Sulisut nangernik taarsersuisartorujussuupput, aamma najugaqartunik ullut tamaasa asattuisarlutik. Sulisut akornanni oqaluuserisorujussuunikuuarput, nangermik taarsiisoqassatillugu, aamma tamatuma sumi pinissaa sulisut tamarmik ilisimassagaat. Anartarfimmi pisartutut namminermut tunngassaaq (privatiussaaq) aamma soorunami najugaqartoq eqqarsaatigineqassalluni. Kisianni nangermik taarsiilerneq sulisut ilisimassavaat. Misilinnikuuarput nangermik taarsiinermi inuit marluusarnissaat, kisianni ilaannikkooriarluta malugisarpaput najugaqartup tamanna qisuariarfigisaraa. Tassa tamanna pitsaavallaanngilaq. Tamanna aamma eqqarsaatigissavarput.

Aqutsisoq alla oqaluttuarpoq, sulisunik amigaateqarneq pissutigalugu tamatigut sulisut amerlasuut ataatsikkut sulinissaat pisinnaaneq ajortoq, naak tamanna tulluarnerpaajussagaluartoq. Taamaallilluni sulisut marluk sulippata, aamma aappaa najugaqartumik immikkut isumaginnittariaqarluni, imaluunniit allamik suliaqartariaqarluni, taava sulisup aappaa immaqa allatut ajornartumik ineqartup quiartornerani, imaluunniit uffarnerani allamilluunniit pisoqarnerani ikiuuttariaqalersinnaavoq, suleqataasup aappaa malinnaasinnaajunnaarsillugu. Aqutsisoq alla oqaluttuarpoq, napparsimasooqartillugu taartaasussanik pissarsiniarneq ajornakusoorsinnaasartoq,

INNUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

aamma ilaannikkut sulisoq ataaseq kisimiilluni unnuami, imaluunniit sannavimmi illersukkami sulisinnaasartog.

Ulloq unnuarlu najugaqarfissatut neqeroorummi ataatsimi ineqartup ataatsip inaa matoqanngilaq. Taanna ineeqqat allat marluk, paarnaasaatitaqanngitsunik matullit, akornanniippoq. Unnuami paarlermut tassunga, ineeqqat inigisaannut, unnuami pigaartup matup illuatungaani inimi sininnerata nalaani, matu matuneqartarpoq. Ineqartut akornanni innaarliinissamut periarfissaqassanersoq sulisut ernumaginngilaat, naak unnuami pigaartup illuatungaani susoqarnersoq tusaasinnaanngikkaluaraa.

Ineqartut kinguaassiuutinut tunngasutigut ujartuillutillu malugititsiniaraangata Ineqartut ilaat nammineerlutik innunnt allanut kinguaassiuutitigut attaveqarniarlutik misiliisinnaasarpur – tassunga ilanngullugu sulisunur. Aqutsisut arlallit aamma sulisut oqaluttuarivaat, qanoq iliorlutik ineqartut kinguaassiuutinut tunngasutigut qaninniarnerat itigartissinnaallugu, ineqartunur takuneqarsinnaasunngorlugu tamanna akuersaarnartuunngitsoq, kisianni naveernagit imaluunniit kanngusutsinnagit. Aqutsisup ataatsip eqqumaffigisorujussuuaa, ineqartut sulisunur kajungerinnilersinnaasarnerat, kisiannili sulisut aamma ineqartunur kajungerinnilersinnaasartur. Ineqartut aamma sulisut akornanni kinguaassiuutitigut kannguttaatsuliorfiginninnerit aamma kinguaassiuutitigut atoqatigiittarnerit pitsaaliorneqassappata ammasumik pisariaqarpur:

Ineqartut paarissavagur. Sulisunit atonerlunneqarnatillu imminnur atonerlussanngillat. Ineqartut kinguaassiuutinut tunngasutigut inersimasunit maluginiarneqarnissaminnur pikkoriffeqarpur. Tamanna ingerlaavartumik oqaloqatigiissutigisarpur. Sulisut kisimik kajungilersitsineq ajorpur. Ineqartut aamma sulisunit kajungilersitsinissamur pikkoriffeqarpur. Taamaattumik ingerlaavartumik oqaloqatigiissutigisarpur, sulisut susoqalersoq malugigaangamikku qanoq iliortassanersur. Taava immikkoortortami aqutsisut imaluunniit suleqatitik oqaloqatigisassavaat: "Ima imalu misigisimavunga." Oqaluuseralugu. Assigiinngitsur pillugit ineqartut aamma sulisut peqatigalugit oqaloqatigiinniarluta kinguaassiuutinut tunngasutigut ilisimasalimmit (sexologimit) pulaartoqarusuppugur. Pingaartumik allani pisoqareernerata kingorna taanna oqaluuserinikuuara, tassa sulisutur ineqartut ilaannit kajungilersinneqartutur, imaluunniit soqutiginnittutur malugigaanni qanoq iliornissaq.

Aqutsisoq alla oqaluttuarpoq, arnat ineqartut ilaat sulisunur angutinur tunngatillugu killissaminnik misileraasartur, taakku qaninniarneqarnermur tunngatillugu killiliinissaminnur pikkoriffeqartariaqarlutik:

Siullermeerlunga malugivara ineqartut taakku marluk sulisunur taamaaliortur (kinguaassiuutinut tunngatillugu qaninniarur, aaqq.). Malittarisassaqarpugur ilaannikkooriarlunga qaqittariaqartakkannik: 'Ineqartut aamma sulisut akornanni kinguaassiuutinut tunngasutigut attaveqatigiinnissaq pitsaasuunngilaq'. Sulisunur angutinur kajungerneq aquttariaqarpoq. Kinguaassiuutinut tunngasutigut eqqarsartarnerat annertoorujussuuvoq. Iviangequtitik oqaluuserisarpaat, aamma sulisut ineqartunur killiliisinnaasariaqarpur. Immikkoortortat tamanna piumasarivaat. Killiliisinnaasariaqarpur. Kisianni ilaannikkut – naak nalunngikkaluarlugu inerteqqutaasoq – misileraajuaannavittarpur.

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

Pisut ilaanni sulisut ineqartunik, namminneq iliuuseqarnermikkut kannguttaatsuliorfigineqarsinnaallutilluunniit innarlerneqarsinnaasunik illersuillutillu ilitsersuisartussaapput. Ineqartooq ataaseq, nittartakkatigut inuit attaveqaaqatigiittarfiinut nammineq atisaqarnani assiminiq ilioraasimasooq, pillugu sulisooq ataaseq oqaluttuarpoq:

Ineqartuuteqarpugut attaveqaaqateqartartorujussuarmik. Assinik ilioraasarpoq. Taava illoqarfimmi inunnut uagut ilisarimangisatsinnut attaveqalersarpoq. Tamanna akuerinngilarput: "Taamaaliortassanngilatit. Inerteqqutaavoq." Atisaqarnatik assiminnik ilioraagaangamik killissamik qaangiineruvoq. Taava angajoqqaat attaveqarfigivagut, iluarsiniarnissaa suleqatigiissutiginiassagatsigu, taamaalilluni assinik ilioraannginniassammat, naak suli oqarasuaatini angallattagaq tigummigaluarlugu. Ineqartut illersussallugit pisussaaffigivarput.

Ineqartooq ataaseq illoqarfimmi angummik kinguaassiuutitigut atoqateqartarnermigut arlaleriarluni nuanninngitsumik misigisaqartartooq pillugu sulisooq alla ima oqaluttuarpoq:

Ineqartooq angerlaraangami oqaluttuurtarpoq angummi naapittakkamini pulaarsimalluni ulluni nuannersuusimasooq. Ineqartooq qaqutigut aliasulluni angerlartarpoq, oqaluttuurtarlunilu: "Sakkortuumik atoqatigivaanga, sakkortuumik iliorpoq." Taava ineqartooq oqarfigisarpaput, nuannarinagu oqartassasooq. Angut piniinnarpoq, taava ineqartooq oqarfigivarput angerlarsimaffianut ornittarunnaassagaa. Ineqartup ulluinnarni inuunera aamma isumaa allanngorartorujussuusarpoq. Ullormiit ullormut kamaakkunnaartarpaa, angerlarsimaffianullu orneqqittarlugu. Taama ingerlarusaaginnavipooq.

Aqutsisooq ataaseq oqaluttuarpoq, ineqartut kinguaassiuutimikkut ineriartuleruttorlutillu paasisaqariartortut, imaluunniit siusinnerusukkut innarlerneqarsimasut pisut ilaanni ineqartunut allanut killissaminnik qaangiisutut pissusilersorsinnaasartut. Ineqartut akunnerminni imminnut killissaminnik qaangiisarnerat ulloq unnuarlu najugaqarfissatut neqeroorummi qanoq misigisarsimatigineraat aperineqarami aqutsisooq ima akivoq:

Aap, pingaartumik inuusuttut ineriartorlutik aallartikkaangamik, aamma imminnut misileralaarlutik aallartikkaangamik. Taamaattorpassuaqarpugut. Ineqartunut oqartarpugut tamakku pisassanngitsut. Taakkumi immikkoortinneqassapput. Taamaalioqqusaanngillat. Tassami, amerlanerit ukiuminnut, ineriartornerminnut sanilliullugu kinguarsimanagerujussuupput. Ineqartut ilaat aamma atornerlunneqareernikuupput. Malugigaangatsigu ineqartut ineqartut allat imaluunniit sulisut killissaannik qaangeeqqajaalersut, taava taamaaliortoq oqarfigisarpaput iniminukalaassasooq. Taava oqaluuserisarpaput sulisut tamanna qanoq suliarissaneraat. Killilersuilluni: "Ima ilioqqusaanngilatit". Tassami, peqqinnartumik. Tamanna akuersaartumik perorsaariaasiuvoq. Pisut eqqortumik oqaloqatigiissutigisarpavut: Killissat suusunuku? Oqaloqatigiinneq. "NAAMIK. TASSA"-mut taarsiullugu.

Ulloq unnuarlu najugaqarfissatut neqeroorutini amerlasuuni aqutsisut aamma sulisut misigisarpaat, ineqartut ilaat sulisunut kinguaassiuutitigut tunngasutigut ujartuisartut, aamma ineqartut sulisullu akornanni kinguaassiuutitigut tunngasutigut atassuteqaaqatigiittoqaqqusaanngitsooq pillugu takutinneqarlutillu oqaluttuunneqarnissaminnik pisariaqartitsisartut. Aqutsisut arlariit

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

erseqqissarpaat, tamanna aamma sulisunut eqqaasitsissutigissallugu pisariaqarsinnaasartog.
Ineqartut ilaat kinguaassiuutinut tunngasutigut illoqarfimmi ujartuisarput, tamannalu ineqartut
kannguttaatsuliorfigineqarnissaannut aamma killissaminnik qaangiiffigineqarnissannut
killikkiartuaarsinnaavoq.

4 Malittarisassat aamma najoqqutassat

Ulloq unnuarlu najugaqarfissatut neqeroorutini assigiinngitsuni taakkunani malittarisassanik aamma najoqqutassanik, aamma ineqartut kinguaassiuutinut tunngasutigit pisinnaatitaaffii aamma kinguaassiuutitigut innarlerneqarnissamut aamma atornerlunneqarnissamut illersorneqarnissaat pillugu najugaqatigiiffimmi najoqqutassanik suliaqartoqarsimanersoq pillugu ilisimasaqarneq assigiinngitsorujussuuvog.

Sumiiffinni tamani aqutsisut aamma sulisut, misissuinermut matumunnga peqataasut, sulisut unnuami pigaartuusut, aamma nangermik taarsiinermi uffartoqarneranilu sulisut amerlasusissaat pillugu najoqqutassat nutaat eqqumaffigivaat.

Najoqqutassanut tunngatillugu, kinguaassiuutinut tunngasutigit pissusilersuutinut tunngatillugu ineqartut qanoq iliorsinnaatitaanerannut aamma qanoq iliorsinnaatitaannginnerannut tunngasut pillugit ineqartut qanoq iliorsinnaatitaannginnerannut tunngasunik amerlasuut pingaarnertut akissuteqarput. Tamani isersimaffineqarsinnaasuni kinguaassiuutinut tunngasutigit pissusilersuuteqaqqusaanngillat, kinguaassiuutinut tunngasutigit imminnut, akunnerminni imaluunniit allanut attuaqqusaanngillat, oqaatsinik aalajangersimasunik oqaqqusaanngillat, imminnut kunittut nipilimmik iliorfigeqqusaanngillat, il.il. Najugaqarfiit ilaanni tamani isersimaffineqarsinnaasuni titartakkanik oqaatsinik imaluunniit isummamik takutitsisunik (piktograminik) peqarpoq, taakkunani qanoq ilioqqusaannginneq takutinneqarluni. Sumiiffimmi ataatsimi, siusinnerusukkut nassuiarneqartut, ineqartut namminneq allanit sukkut attorneqarusunnginnerlutik timimik titartakkatigut takutitsipput. Sumiiffimmi allami aqutsisoq oqaluttuarpoq, ineqartumut aalajangersimasumut tunngatillugu titartakkat oqaatsinik imaluunniit isummanik takutitsisut (piktogramit) qanoq atorneqarnersut:

Kanani titartakkanik oqaatsinik imaluunniit isummanik takutitsisunik (piktograminik) peqarpugut. Najugaqartoq ataaseq sulisut iviangiinik imaluunniit nuluinik attuisinnaasarpog. Taava oqaluttuuttarparput, titartakkallu oqaatsinik imaluunniit isummanik takutitsisut (piktogramit) atorlugit sulisut attoqqusaannginnerannik takutittarlugu. Sulisoq, ineqartumik unnukut innartitsisoq, aamma taassumunnga atuakkamik atuffassisarpoq, tassani takuneqarsinnaalluni sulisut iviangiisigut attorneqaqqusaanngitsut. Tamanna iluaqutaanikuuvog. Taamaaliorpiassaarnikuuvog. Kinguaassiuutinut tunngasutigit iliuuseqarusukkaanni tamanna nammineq inigisami pisussaavog. Ammavog, kisianni sulisut tungaanuunngitsoq.

Ineqartut kinguaassiuutinut tunngasutigit atuinerannik aamma kinguaassiuutinut tunngasutigit pisariaqartitaannut tunngatillugu sulisut aamma aqutsisut pingaarnertut qanoq isummerfiginnittassanersut pillugu najoqqutassat pineqartillugit suut pigineqarnersut, aamma kinguaassiuutinut tunngasut ulluinnarni ilumut isummerfigineqartarnersut assigiinngitsorujussuuvog.

Ulloq unnuarlu najugaqarfissatut neqeroorummi aqutsisoq ataaseq nassuiaavog, sumiiffimmi tassani kinguaassiuutinut tunngasut pillugit politikkeqartoq, kinguaassiuutinut tunngasutigit pisariaqartitsinermut aamma killissanut tunngasumik:

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

*Kinguaassiuutinut tunngasut pillugit politikkeqarpugut, kinguaassiuutinut
tunngasutigut pisariaqartitsineq inuup ilaatut akuersaartuusumik, kisianni aamma
kinguaassiuutinut tunngasunik kannguttaatsuliorfiginninnginnissamik,
innarliinnginnissamik, imaluunniit kannguttaatsuliorfigineqannginnissamik
ilitsersuiffiusumik.*

Sulisup ataatsip taatsiarpa, immikkoortortami suliffigisamini najoqqutassanik
takkuttoqangajalerunartoq:

*Aqutsisorput malittarisassanik imaluunniit ilitsersuutitut ittunik sananiaraluarpoq.
Immikkoortortami allami taamaattunik peqarput. Pingaaruteqarsimasuuppata
aqutsisorput uagutsinni aamma taamaalorsimassagaluarpoq.*

Sulisoq ataaseq nassuiaavoq, ineqartumik kinguaassiuutinut tunngasutigut
pissusilersortoqarsimagaangat sulisut sulisut ullorsiutaannut allattartut. Taamaaliornikkut ineqartoq
aalajangersimasoq sulisut tamarmik eqqumaffigisinnaavaat:

*Malugisaqaraangatta ullaakkut, ullup qiterarnerani aamma unnukut
susooqarsimansoq pillugu sulisut ullorsiutaannut allattarpugut. Susooqarsimagaangat
tamarmik allaqqasarput. Kinguaassiuutinut tunngasutigut
piumassuseqartoqaleraangat malugineqarsinnaasarpoq.*

Ulloq unnuarlu najugaqarfissatut neqeroorummi aalajangersimasumi najoqqutassanik imaluunniit
kinguaassiuutinut tunngasutigut politikkimik peqartoqarnerisooq apeqqummut sulisoq ataaseq ima
akissuteqarpoq:

*Naamik, maani sulillunga aallartikkama taamaallaat oqaluttuunneqarpunga ineqartoq
una unalu inuusamik atoqatigiinnermut tunngasumik (sexdukkemik) atuisarpoq,
ineqartoq una "usuusaateqarpoq" (dildoqarpoq) il.il. Najoqqutassanik allassimasunik
suli takunikuunngilanga.*

Kannguttaatsuliorfiginninnermik imaluunniit innarliinermik pasitsaassinermi
iliusissatut pilersaarutit

Apersorneqartut tamarmik aperineqarput, kinguaassiuutinut tunngasutigut
iliuserineqartussaannngitsumik iliuseqartoqartoq pasitsaassinermi qanoq periuseqassanerlutik
ilisimaneeraat. Sulisoq ataaseq ima nassuiaavoq:

*Ineqartumik kinguaassiuutitigut atoqateqarniartut aqutsisup attaveqarfisinnavaai:
"Taanna taama iliorfiginagu, ikinngutigigaluarussiulluunniit". Allatut
iliuseqarsinnaanngikkaanni politiit attaveqarfigineqartarput.*

Ulloq unnuarlu najugaqarfissatut neqeroorutit ilaanni ataatsimi sulisut apersorneqartut ilaasa
akeriaannaanngilaat kinguaassiuutitigut atonerluisoqarneranik pasitsaassinermi najoqqutassanik

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

aamma iliuusissatut pilersaarutiniq peqarnerseq, isumaqarlutillu peqarsimassasq. Ulloq unnuarlu najugaqarfissatut neqeroorummi tassani sulisut allat oqaluttuarput, najoqqutassaqqartoq aamma tamanna sulisut akornanni akulikitsumik oqaloqatigiissutigineqartartoq:

Aap, pisuni assigiinngitsuni qanoq iliussanerluta ataatsimiinnerni oqaloqatigiissutigisarpaput, aamma malitatsinnik kinguaassiuutinut tunngasunut politikkeqarpoq, taannalu maani unioqqutinneqarneq ajorpoq.

Aqutsisoq ataaseq oqaluttuarpoq, ineqartut kinguaassiuutinut tunngasutigut inuuneqarnerannut, aamma kinguaassiuutinut tunngasutigut pisinnaatitaaffiitut tunngasunik pisortatigoortumik najoqqutassaqqangitsoq, kisianni tamanna sulisut ataatsimiinnerini oqaloqatigiissutigineqartartoq. Taanna aamma innarliisoqarneranik pasitsaassinermi suleriaatsinik ilisimasaqqangilaq:

Aqutsisoq: Ilisimasavut sapinngisamik sulisut ataatsimiinnerini oqaloqatigiissutiginiarsarisarpavut, ineqartut kinguaassiuutinut tunngasutigut inuuneqarnerat sulisut taamaalillutik qanoq periuseqarfigissanerlugu ilisimaniassammassuk, aamma sulisut assigiimmik oqartassasut, taamaalillutik ineqartut assigiinngitsunik ilisimatinneqannginniassammata. Sulisut isumaqatigiissapput.

Apersuisoq: Pisortatigoortumik najoqqutassanik, sulisut malitassaannik, peqarpa?

Aqutsisoq: Isumaqqanngilanga najoqqutassaqqarluta. Oqaloqatigiissutigisarpavut. Taanna allalaalpara.

Apersuisoq: Iliuusissatut pilersaaruteqarpisi, taamaalillusi atornerluisoqarneranik pasitsaassinermi qanoq iliussanerlusi ilisimallugu? Arlaannik pisussaangitsumik pisoqarneranik isumaqarunik qanoq iliussanerlutik tamarmik nalungilaat? Aqutsisoq: Ilisimasakka malillugit naamik.

Aqutsisut aamma sulisut allat sunik najoqqutassaqqarnera, aamma pisussaangitsumik pisoqarneranik pasitsaassinermi qanoq iliussallutik ilisimavaat:

Kinguaassiuutinut tunngasutigut politikkitut ittumik tunineqartarpugut. Assersuutigalugu sulisut akornanni, imaluunniit sulisut ineqartullu akornanni tagiartuisoqaqqusaanngilaq. Sulisut ineqartullu akornanni arlaannik susoqaraangat immersugassamik immersuisussaavugut. Assersuutigalugu ilaannikkut misigisarpaput, ineqartut ilaaq arnamut sulisumut qaninniartartoq. Taamaattumik piumasaqaataavoq immersugassamik immersuissasugut. Arlaannik pasinartoqartillugu suliap ingerlanerani sulisoq angerlartinneqarallartussaavoq, suliarlu naammassineqareerpat aatsaat susoqaqqissalluni.

Aqutsisoq ataaseq oqaluttuarpoq, kinguaassiuutitigut kannguttaatsuliorfiginninnermik pasitsaassinermi iliuusissatut pilersaarutini alloriarnerit ataasiakkaat suliarinissaannut piffissaliussat eqqortinnissaat ilaatigut qanoq ajornakusoortigisinnaasarnersq:

Aap, najoqqutassat aamma iliuusissatut pilersaarutit malinneqartarput, kisianni ilaannikkut suliassap suliariniarnerani pisup eqqoqqissaartumik nassuiarniarneranut nalunaarutiginninnissamat piffissaliussaqqangerneqarsinnaasarpoq.

Najoqqutassat naalackersuisoqarfimmeersut, aamma kinguaassiuutinut tunngasutigut politikki paaqqutarinniffimmi suliarineqarsimasq pillugit aqutsisoq alla ima oqaluttuarpoq:

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

Kinguaassiuutininut tunngasutigut politikkeqarpugut. Taanna uagut nammineq paaqutarinniffitsinninngaanneersuuvoq. Aamma ulloq unnuarlu angerlarsimaffinni kinguaassiuutininut tunngasutigut najoqqutassat pigineqarput – taanna malipparput. Taanna naalackersuisoqarfimminngaanneersuuvoq. Taanna malillugu sulivugut. Uagut nammineq pigisarput WHO-meersoq malillugu suliarivarput. Pasinartoqartillugu qanoq iliussallutik tamarmik nalunngilaat. Immikkoortortaminni aqutsisoqarput, aamma immikkoortortani aqutsisut uagutsinnut saaffiginnissapput. Tamatuma saniatigut naalackersuisoqarfik aamma attaveqarfigisinnaavarput.

Aqutsisut pingajuat oqaluttuarpoq, kinguaassiuutininut tunngasutigut politikkeqartoq, siusinnerusukkut taaneqartup 2022-mi lvaqqami pisimasup pereernerata kingorna suliarineqarsimasumik. Tamatuma saniatigut sulisut marluk, ulloq unnuarlu najugaqarfissatut neqeroorummi pineqartumi sulisuusut, inuit innarluutillit kinguaassiuutininut tunngasutigut inuuneqarnerat pillugu pikkorissarlutillu ilisimasaqarnerulersimapput.

Sulisup ataatsip oqaatigivaa, suliassaqarfik ajornakusoortuusooq, aamma sulisut piareersarfigisimasariaqaraat:

Tamanna oqaloqatigiissutigivallaarneq ajorparput. Ajornakusoorpoq. Oqaloqatigiissutiginnissaa piareersimaffigisariaqarparput. Aamma qanoq periuseqarfigissanerlugu, naak malittarisassaqaraluartoq.

Aqutsisoq ataaseq oqaluttuarpoq, ulloq unnuarlu najugaqarfissatut neqeroorummi aqutsisuuffimmini najoqqutassaqaarlunilu kinguaassiuutininut tunngasutigut politikkeqartoq, kisianni taakku sulisut qanoq ilioqqusaannginnerannut tunngapput. Ineqartut kinguaassiuutininut tunngasutigut inuuneqarnerat sammineqanngilaq. Aqutsisoq taanna oqaluttuarpoq, "lvaqqami pisimasooq" pereersoq kannguttaatsuliorfiginninnissamik aamma innarliinissamik pitsaaliunissat pillugit malittarisassanik arlaqarnerusunik takkuttoqartoq:

Kisianni malittarisassat taakku, uanga isumaqarpunga sukkasuumik aalajangersarneqarsimasut. Tassami taamaappoq. Qulaaninngaanniit. Uagut qanimut suleqatiginata. Kisianni massakut Isumaginninnermut Aqutsisoqarfik peqatigalugu forstanderit ataatsimiikkaangatta kinguaassiuutininut tunngasutigut politikkit allallu eqqartortalerpavut. Tamanna sammineqarnerulaartariaqaraluartoq. Ilisimasassanik sineriak tamakkerlugu amigaateqarpugut. Sumiiffitsinni najoqqutassaqaarpugut, sulilernerimi ilisimatitsissutigineqartartunik. Aamma taakku ataatsimoorussamik drevitsinni pissarsiarineqarsinnaajuaannarput. Aamma oqaluuserisassanik mianernartunik oqaluuserisassaqaaraangat sulisut ataatsimiinnerini tamakku eqqartortarpavut. Qanoq iliuseqarfigisinnaanerlugit, tamakkulu oqaloqatigiissutigisarpavut. Arlaannaalluunniit kisimiittutut misigisimassanngilaq. Kisianni innarliisarneq siunissami oqaluuserinerussavarput.

Aqutsisoq ataaseq oqaluttuarpoq, najoqqutassaqaartoq, kisianni namminneq ulloq unnuarlu najugaqarfissatut neqerooruteqarfimmininngaanneersuuvoq, assigiinngitsunik paasiniaasariaqartarlutik, aamma ilisimasassanik amigaateqarlutik. Najoqqutassat taakku ilaannikkooriarlutik eqqaasitsissutigineqartariaqartarput, aammalu malittarisassanik nutaanik takkuttoqaaqqammerluni. Taakku sulisut ataatsimiinnerini nassuiarneqartarput.

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

Malittarisassat aamma najoqqutassat sorliit aqutsisut aamma sulisut apersorneqartut ilisimasaqarfigineraat, aamma ulloq unnuarlu najugaqarfissatut neqeroorutini ataasiakkaani kinguaassiuutinut tunngasutigut politikkeqarnerisq imaluunniit politikkeqannginnerisq taamaalilluni assigiinngitsorujussuvoq.

5 Kinguaassiuutitigut kannguttaatsuliorfiginninnerit aamma innarliinnerit

Ulloq unnuarlu najugaqarfissatut neqeroorutini tamani, ataaseq kisiat minillugu, aqutsisut aamma/imaluunniit sulisut ineqartunut kinguaassiuutitigut kannguttaatsuliorfiginninnerit aamma innarliinnerit pasitsaassinernik imaluunniit kannguttaatsuliorfiginnissimanernik aamma innarliisimanernik ilisimasaqarput. Arlaleriarluni qangali pisimasuusimasunik suliaqartoqartarnikuuvoq. Pisut ilaat ukiut kingullit ingerlaneranni suliaasimapput. Ilaannikkooriarluni ulloq unnuarlu najugaqarfissatut neqeroorutini allani pisimasunik ilisimasaqartoqartarpoq, aamma pisuni allani ulloq unnuarlu najugaqarfissatut neqeroorummi nammineq suliffigisami pisimasunik ilisimasaqartoqartarluni. Sulisunut tunngatillugu suliat ilaanni sulisut ilanngutitinneqarnikuusimasarput, aamma suliat ilaanni illoqarfimmi inuit ilanngutitinneqarnikuusimasarlutik.

Aqutsisoq ataaseq oqaluttuarpoq, ulloq unnuarlu najugaqarfissatut neqeroorummi pedelit sulisorineqartut ajornartorsiutaasarsimasut, taamaattumillu atorfimmud tassunga inuttaliinissaq piivinneqarsimalluni:

Assigiinngitsunik maani sulisunik pedeleqartarnikuuvugut. Tamanna politiitigoornikuuvoq. Misiginikuuarput pedelit ineqartunut kajungilersitsisartut. Pisut assigiinngitsuunikuupput. Taava taanna pedeleqartarneq unitsinnikuuarput, taava perorsaasutut iliniarsimasoq sannavimmi illersugaasumi sulisoq atortarparput, immikkoortortoqarfimmi arlaannik suliaqartoqassatillugu ineqartunik sulisunillu suleqateqartarluni. Taamaaliornikkut tamakku pinngitsoortinniarsarivagut.

Aqutsisoq ataaseq oqaluttuarpoq, angummik sulisoqarnikuusimasoq, ineqartumik kinguaassiuutitigut atoqateqariaraluarsimasumik:

Anguteqarpoq maani immikkoortortoqarfimmi sulisarnikuusumik. Taanna aamma 2022-mi ingerlaannartumik suliunnaarsinneqarpoq. Taanna sullitaminut misileeriaraluarnikuuvoq.

Aqutsisoq ataaseq oqaluttuarpoq, ineqartup kissaateqarneratigut inuit illoqarfimmeersut politiinut nalunaarutigineqartariaqarsimasut:

Aqutsisoq: Illoqarfinninngaanneersoqaraangat, aamma ineqartoq oqaraangat politiinut saaffiginnikkusulluni, taava unnerluutigisarpavut. Taava taamaaliussaagut. Apersuisoq: Tassa pisoqarnikuuvoq ingerlateqqittariaqakkassinnik? Aqutsisoq: Aap, taamaattoqarnikuuvoq.

Siusinnerusukkut pisimasoq pillugu aqutsisoq ataaseq oqaluttuarpoq:

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

Uanga nammineq ukiut arlallit matuma siorna pisumik misigisaqarnikuuvunga, sulisoq ineqartunut attaveqartartoq, immaqalu aamma taakku akornanni arlaannik pisoqartarsimalluni. Pineqartoq oqaloqatigivarput, taavalu Isumaginninnermut Aqutsisoqarfik attaveqarfigalugu. Taanna suliassanngortinneqarpoq, pineqartorlu soraarsitaalluni.

Sulisup ataatsip suliaq ataaseq oqaluttuarivaa, sulisup paasisimagaa suleqatini ineqartumik kinguaassiuutitigut atoqateqartoq:

Sulisuq soraarami puigugaqarsimavoq. Taamaattumik taanna puigukkani aaniarlugu ulloq unnuarlu najugarfissatut neqeroorummut uteqqissimavoq. Taassuma tassani malugivaa, arnap ineqartup inaanut matu parnaaqgasoq. Siusinnerusukkulli arlaannik pisoqartartoq pasitsaanneqarnikuuvoq, kisiannili uppersaatissaqarnani. Politiit erngerlutik takkupput, forstanderi erngerluni takkuppoq. Politiit ineqartoq ingerlaannaq napparsimmaviliaappaat, sulisorlu taanna ingerlaannartumik tigummigallarneqalerluni. Ineqartoq misissorneqarpoq, kingornalu angerlarteqqinneqarluni. Taanna oqaatsinik atuisinnaanngilaq, kisianni nuannaarpoq, aamma angut taanna sulisoq nuannarisorujussuujuannarnikuullugu.

Aqutsisup pisoq ataaseq oqaluttuarivaa, ineqartup aamma sulisup akornanni kinguaassiuutitut tunngasutigit pisoqarsimagunartoq, kisianni eqqunngitsumik pasinninnerusinnaasut pineqarunarlutik:

Sulisup aamma siusinnerusukkut ineqartup akornanni pisoqarnikuuvoq. Ineqartoq kinguaassiuutitut tunngasutigit ujartuillaarsimavoq, aammalu angummik unnuarsiortoqarluni. Ineqartoq oqarpoq taassuma kinguaassiuutimigut atoqatiginiarluni misilissimagaa, naak tamanna eqqunngikkaluartoq. Tamanna uppersaatissarsisinnaasimannngilarput, kisianni sulisoq pineqartoq soraarsitaavoq.

Illoqarfimmi innuttaasut aamma ineqartut akornanni aamma attaveqatigiittoqartarpoq, ineqartut kinguaassiuutitigut kannguttaatsuliorfigineqarsinnaanerannik kinguneqarsinnaasumik. Assersuutigalugu ineqartut internettikkut inuit attaveqatigiittaarfiinik atuinerannut atatillugu. Aqutsisoq ataaseq ima oqaluttuarpoq:

Aap, ineqartut ilaat nunaqqataasunik naleqqutinngitsumik attaveqateqartarnikupput. Taava ineqartoq oqaloqatigisarpavut, oqaluttuullugulu suna eqqortuunnginnersoq. Ineqartut paarigivut oqaluttuunniarsarisarpavut. Arlaannik ingasaassisumik imaluunniit eqqumiitsumik pineqassanngillat. Illoqarfimmi inuit ilaasa ineqartut atoqatiginiarlugit attaveqarfigisaraat misigisartorujussuarput, arlaannik pilerisaarlugit imaluunniit allatut iliorlutik. Taava politiit attaveqarfigisarpavut, politiillu suliassaq suliarisarpaat.

Sulianik pisoqqanik aamma nutaanik ilisimasaqarnerup siammasissup, aamma ineqartunut kinguaassiuutitigut kannguttaatsuliorfiginninnermik aamma innarliinermik pasitsaassisarnerit takutippaat, tamanna maluunnaatilimmik pisartuusooq, aamma inunnut innarluutilinnut ulloq unnuarlu najugaqarfissatut neqeroorutini najugallit kinguaassiuutitigut

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

kannguttaatsuliorfigineqaratarsinnaanermut aamma innarlerneqaratarsinnaanermut tunngatillugu
immikkut aarlerinartumik inissisimasuusut.

Inassuteqaatit

- **Kinguaassiuutinut tunngasut pillugit ilinniartitsineq**
Misissuinermi takuneqarsinnaavoq, ulloq unnuarlu najugaqarfissatut neqeroorutini amerlanerpaani aqutsisut aamma sulisut ineqartut kinguaassiuutinut tunngasutigit pisinnaatitaaffiinik aamma pisariaqartitaannik, kiisalu kinguaassiuutinut tunngasut pillugit ineqartut qanoq oqaloqatigisinnaanerlugit ilisimasassatigut amigaateqartut.
*Inassutigivarput, ulloq unnuarlu najugaqarfissatut neqeroorutini tamani sulisut kinguaassiuutinut tunngasut pillugit ilinniartinneqassasut, pisariaqartitsineq, pisinnaatitaaffiit aamma perorsaanikkut sammivilimmik kinguaassiuutinut tunngasut aamma ineqartunik, kiisalu sulisut akornanni oqaloqatiginnittarnerit ulloq unnuarlu najugaqarfissatut neqeroorutini ulluinnarni inuunermut qanoq ilanngutitneqarsinnaanerannut tunngasut ilanngullugit. Piviusorsioortuunngilaq sulisut tamarmik assigiimmik ajornaquteqanngitsumik kinguaassiuutinut tunngasunik, pisariaqartitsinernik aamma pisinnaatitaaffinnik akunnerminni aamma najugaqartunik oqaloqatigiissuteqarsinnaalissasut, kisianni pingaaruteqarpoq, tamarmik tamatuminna ilisimasaqassasut, aamma oqaloqatigiinnerit tamakku ingerlassinnaanissaannut ulloq unnuarlu najugaqarfissatut neqeroorutini tamani sulisut arlallit suliassaqaarfimmik suliaqarsinnaanerminnik, aamma namminneq inuttut piareersimasutut misigisimassasut. Tamatuma saniatigut inassutigivarput, kinguaassiuutinut tunngasut aamma ilitsersuineq *perorsaanikkut aamma isumaginninnikkut suliassaqaarfiup iluani ilinniartitaanerup iluani sammineqarnerulissasut.**
- **Kinguaassiuutinut tunngasutigit politikki**
Kinguaassiuutinut tunngasutigit politikki, periarfissanik aamma illersugaanernik sunik nassataqartumik pisinnaatitaaffinnik nassuiaatitalik, paaqqutarinniffinni, inuit ulluinnartik aamma inuunertik tamakkerlugu najugaqarfigisaanni, piunasaqaataasariaqaraluarpoq.
- **Siunnerfeqarnerusumik ilitsersuineq aamma tunngavissanik aalajangersaaneq**
Paaqqutarinniffinni kinguaassiuutinut tunngasutigit pisinnaatitaaffinnik aamma killissanik ilisimasaqarnerulerneq tunngavissanik eqqoqqissaarnerusunik pilersitsinissamut ilapittuutaasinnaapput. Ulloq unnuarlu najugaqarfissatut neqerooruteqarpoq kinguaassiuutinut tunngasutigit pisinnaatitaaffinnik aamma malittarisassanik paasinnilluarsimasunik, aamma ulloq unnuarlu najugaqarfissatut neqerooruteqarpoq ineqartut pisinnaatitaaffiit akimmisaarutaasinnaasumik ilisimasassanik amigaateqarfiusunik, tunngavissanik pilersitsinngitsoornermik, imaluunniit tunngavissanik amigartumik pilersitsinissamik, imaluunniit tunngavissanik sakkortuallaartunik pilersitsinissamik kinguneqarsinnaasumik.
- **Kinguaassiuutinut tunngasutigit pinnguaatit (sexlegetøjt) atortorissaarutit**
Ineqartut kinguaassiuutinut tunngasutigit pinnguaatinik (sexlegetøjinik) pissarsinissaminnut periarfissaat assigiinngillat. Ineqartut amerlasuut kinguaassiuutitigit atoqatigisartakkaminnik aappaqanngillat, aamma taamaalilluni kinguaassiuutinut tunngasutigit taakku matussusiinissaannut aamma pisariaqartitsinerannut pinnguaatit (sexlegetøjt) ikiuutaasinnaapput. Inassutigivarput, kinguaassiuutinut tunngasutigit atortorissaarutit pinnguaatinik (sexlegetøjinik) pisiniartarnissamut aamma atuinissamut nuna tamakkerlugu najoqqutassaliortoqassasoq, taamaalilluni kinguaassiuutinut tunngasutigit atortorissaarutit (sexlegetøjinut) tunngatillugu ineqartut pisariaqartitaminnik

INUNNUT INNARLUUTILINNUT ULLOQ UNNUARLU NAJUGAQARFISSATUT
NEQEROORUTINI KINGUAASSIUUTINUT TUNNGASUTIGUT PISSUTSIT, AAMMA
KINGUAASSIUUTITIGUT INNARLIISARNERIT

ikiorneqarsinnaanersut ulloq unnuarlu najugarfissatut neqeroorutini ataasiakkaani suleriaaseq apeqqutaatikunnaarlugu. Taakkununga tunngatillugu aningaasaqarnerup erseqqissarneqarnissaa najoqqutassani taakkunani ilaasariaqarpoq.

- **Sulisunut nutaanut pikkorissartitsigasuarnarit**

Inassutigivarput, ineqartut kinguaassiuutinut tunngasutigut pisinnaatitaaffiinut aamma atugarissaarnissaannut tunngasut pillugit sulisunut nutaanut siunnerfilimmik digitali atorlugu pikkorissartitsigasuarnernik ingerlanneqartartussanik ineriartortitsisoqassasoq. Pikkorissarneq immikkoortuukkuutaanut arlalinnut agguataarneqarsinnaavoq, sulisunut nutaanut sulilernermit atatillugu piffissap aalajangersimasup iluani ataasiakkaarluni ingerlatissallugu pisussaaffiliisumik. Pikkorissartitsineq paasissutiissiinnermut tunngasunik ilaqarnermi saniatigut misileraanernik annikitsunik ilaqarsinnaavoq, taamaalilluni pikkorissartut pikkorissartitsineq ingerlassimallugu, aamma imarisaa paasisimallugu misissorsinnaaniassammassuk.

- **Ilikkagaqarfissatut pinngitsoorani aallunneqartartussaq**

Kinguaassiuutinut tunngasutigut pisinnaatitaaffiit, pisariaqartitat aamma kinguaassiuutitigut innarliinissamik pitsaaliuineq aalajangersimasumik aallunneqartartussatut ilanngunneqartariaqarput, aamma ukiumut ataasiarluni, imaluunniit akulikinnerusumik qaqinneqartariaqarlutik, taamaaliornikkut aqutsisut aamma sulisut aalajangersimasumik sammisaq pillugu iliuseqartarniassammata, aamma suliassaqarfiup taassuma iluani ulloq unnuarlu najugaqarfissatut neqeroorummi allannguisoqassanersoq nalilersorlugu.

- **Nakkutilliineq**

Inassutigivarput, nakkutilliinnermut aalajangersimasumut ilanngullugu ulloq unnuarlu najugaqarfissatut neqeroorutit kinguaassiuutinut tunngasutigut, pisinnaatitaaffitsigut aamma kinguaassiuutitigut kannгуттаatsuliorfiginninnissap pitsaaliornissaanut tunngatillugu qanoq periuseqarnerlutik pillugu nalunaaruteqartassasut.

- **Pasinapiluttumik kalerriisoqarsinnaaneranik aaqqiissut (Whistleblowerordning)**

Ulloq unnuarlu najugaqarfissatut neqeroorutini kinguaassiuutinut tunngasutigut pisussaangitsumik pisoqarneranik pasitsaassinermi qanorpiaq iliornissaminnik sulisut ilaat nalornissuteqarput. Taamaattumik pasinapiluttoqarneranik kalerriisoqarsinnaaneranik aaqqiissummik (whistleblowerordningimik) pilersitsisoqarnissaa inassutigivarput, aqutsisut, sulisut aamma najugaqartut tamarmik pasitsaassaqarnerminnik oqaluttuarniarlutik imaluunniit nalorninermi apeqquteqarniarlutik sianerfigisinnaasaannik.

Najoqquat

- Barstad, B. (2006). *Seksualitet og utviklingshemming*. Oslo: Universitetsforlaget.
- Buttenschøn, J. (2001). *Sexologi. En bog for professionelle og forældre om udviklingshæmmede menneskers seksualitet*. (Vol. 2. udgave). Målaga: EIBA-PRESS.
- Cunningham, M., & Sena, P. K. (2013). *Study on the situation of indigenous persons with disabilities, with a particular focus on challenges faced with regard to the full enjoyment of human rights and inclusion in development*. Retrieved from
- Engen, M. (2016). Kroppen i socialpædagogisk arbejde. *Tidsskrift for arbejdsliv*, 18.
- Engen, M., & Ibsen, D. L. (2022). Litteraturstudie: Overgreb mod piger og kvinder med udviklingshandicap.
- Kristensen, K. (2022). Ingen stramninger: Mimis påkrævede stramninger fandtes i forvejen. *Sermitsiaq AG*. Retrieved from <https://sermitsiaq.ag/ingen-stramningermimis-pakraevende-stramninger-fandtes-i-forvejen>.
- Nørtoft, K. et. (2023). *Beboerperspektiver på botilbud til mennesker med handicap*, Statens Institut for Folkesundhed, Syddansk Universitet.
- Rytoft, A. (2022). DNA-match: 62-årig indrømmer voldtægt af multihandicappet kvinde. *Sermitsiaq AG*. Retrieved from <https://sermitsiaq.ag/dna-match62-aarig-indroemmer-voldtaegt-multihandicappet-kvinde>
- Rytoft, A. (2023). Ingen mandlige nattevagter på Ivaaraq. *Sermitsiaq AG*. Retrieved from <https://sermitsiaq.ag/ingen-mandlige-nattevagter-ivaaraq>
- Shah, S. (2017). "Disabled People Are Sexual Citizens Too": Supporting Sexual Identity, Well-being, and Safety for Disabled Young People. Social- og Boligstyrelsen. Behandling af seksuelle overgreb mod mennesker med udviklingshæmning. Retrieved from <https://sbst.dk/handicap/udviklingshaemning/temaer/seksualitet/behandling>
- Standard Rules on the Equalization of Opportunities for Persons with Disabilities, (1993).
- Rubin, S. E. (2023). *Generelle forhold på botilbud til mennesker med handicap*, Statens Institut for Folkesundhed, Syddansk Universitet.
- United Nations. (2012). *Report of the Office of the United Nations High Commissioner for Human Rights. Thematic study on the issue of violence against women and girls and disability*. Retrieved from www.retsinformation.dk.
- (2001). *VEJ nr 22 af 10/02/1989. Vejledning vedrørende seksualundervisning og seksualoplysning af mennesker med ophold i institutioner for personer med vidtgående fysiske eller psykiske handicap og i særlige plejehjem*.